

碑
墓碣

藥泉集
十

藥泉集第十九目錄

碑

忠愍祠

李忠武公記事碑陰記

露梁六臣墓

雙樹山城記事碑追記

高下島李忠武公記事

墓碣銘

兵曹佐郎鄭公

載海

黃善士

德基

贈叅奉崔公

尚高

驪州牧使權公

覲

陰記

通德郎林公

秀栢

僉知中樞張君

遴

同知中樞鄭公

縑

公州牧使金公

孝誠

掌令趙公

爾炳

副護軍奉君

珩

僉知中樞朴公

濠

曹生

夏重

利仁察訪朴公

宗岳

咸鏡北虞侯洪君

有量

戶曹正郎尹公

敘績

僉知中樞李公

憲

真國

高平島李忠左公信事

靈采六田墓

雙林山洪信事

忠烈師

李忠左公信事

戰

藥身集卷十九目錄

藥泉集第十九

碑

忠愍祠碑

癸未

昔在 我仁祖大王二年甲子冬以西事日棘拜宜
春君南公以興爲平安道兵馬節度使兼兩西巡邊
使鎮龜城行營丁卯正月敵兵夜渡鴨江陷義州列
郡崩潰無敢嬰之者公以安州爲敵路必守之地率
隨營牌三百兼程疾馳僅入城門敵之先驅已渡薩
水薄城下矣與虞侯朴命龍牧使金浚及本州中軍
梁晉國千總林忠恕等爲守城計前江界府使李尚

安龜城府使全尚毅价川郡守張墩永柔縣令宋圖
南泰川縣監金良彥博川郡守尹惠孟山縣監宋德
榮等亦先後入城前守門將咸應秀前訓練院奉事
金彥壽韓德文等以州中武士亦隸焉時倉卒號召
城中軍民合主客老弱不滿數千不待與敵相角城
中人已知其必不保然公與諸君唯以忠義相激厲
誓同一死降將弘立蘭英叛人潤時在敵中吹唇鼓
頰叫噪於城外曰强弱之勢衆所共見與其城陷而
魚肉曷若和好而全安公厲聲應之曰吾等受命守
城一死職耳豈忍爲汝輩賣國偷生自以爲得計哉

城中人益知公有必死心皆爲之感泣敵知城之不可以虛聲下乃縱兵合圍肉薄登堞公與將士飲血裹創終日拒戰及暮敵始退翌朝以城東隅低且夷易攀援箴矢攢射驚散其守卒萬足齊躍一擁而上公登譙樓射敵矢旣盡將然火藥自焚揮去從人唯軍官鄭延祿寧邊官奴執勒者愛男二人攀檻不去曰公旣死國我當死公與之俱焚公死時年五十二事聞贈左議政旌閭賜祭存恤母妻男斗極終喪直除縣監贈公謚曰忠壯公字士豪宜寧人父瑜以羅州牧使與李舜臣禦倭同死於露梁之戰及公亡母

夫人年八十哭之曰往歲父死南海今年子死西塞死亦榮矣何恨之有甲子逆适之難公以前兵使爲都元帥張晚中軍總軍政破賊鞍峴策勲一等兼備邊司提調以公習兵事且有遺惠於西民委以干城當是時在中朝則遼瀋繼陷在我國則二帥生降而敵與我只隔一衣帶水耳其勢凜凜不翅千鈞一髮之危國家旣以暮夜之虞託公則雖掃國內精勇盡屬之而軍功爵賞皆決於外不從中覆如趙之任牧猶懼其不濟柰其時纔經逆變餘悸未定秉國諸臣不能無猜防雖以我公之忠蓋勲勞素見服於中

外者然猶伺察非常交織前後凡有上請無一可之
者麾下所領唯偏裨廝徒若而人亦且首尾畏忌常
慮蜚語之或中刊章之或及秉鉞三載不得一聚兵
習操噐械不得鍊城池不得修搏力勾卒無預教蘭
石渠答無預具以一片必破之孤城當天下無敵之
強敵終不能如安市之全城而只得辦睢陽之殺身
在臣節則無憾其於國事何哉公之在圍城刺血書
狀啓有曰萬死之外更無所爲至今讀之有餘恫焉
雖然當公旣歿爲敵人計乘勝長驅傳漢師窺江都
宜無難者然且駐軍中道宿畱遲回媾和而撤去者

非畏我非愛我實緣兵鈍於積日之相持心懾於滿城之效死氣勢自沮有不得極其力之所至故也若使丙子之再刳也有能當兵所衝立懂而怒敵使之棄疾於一城而與之俱碎如公之爲者則未必有南漢之事南漢若不下則中原之不支亦未必如丁丑以後然則當日我公之守此城非但係本朝存亡亦且關天下興喪矣昔嘗聞之公之未歿也其再從兄春城君以雄航海朝天畱玉河館忽見通衢高揭紅紙書公姓名詢于譯人曰此爾國守城死事臣南某書名徇衆乃天朝褒節之殊典也春城始知公

死哭臨于名下華人知爲公之族也待之加禮噫外
邦陪臣之死其城守自中朝視之其事微似不足
爲之獎聳乃如此猶夫然者無亦知安危勝敗自有
相及之勢故耶當城之初被圍敵請見我人宜春公
使朴虞侯往敵誘以和朴公曰此非守疆臣所聞乃
拂衣還蘭英從後呼前執手曰義州之敗君兄旣死
明日城陷君亦難免兄弟俱殲有何益乎朴公怒叱
却之朴公之兄成龍以前任龜城府使先死於義州
故云敵兵旣登城猶力戰所殺甚衆矢盡劒折遂死
於城上贈兵曹判書致祭旌閭先是朝廷以安州爲

近塞大城推擇金公拜牧使兼防禦使而遣之然手下無兵募得僧軍千人頗精銳朝廷以爲不便而罷之金公計無所施嘗私謂丙寅迎詔使賓价曰方今二閩不敢治兵吾亦徒擁使號敵不來則大善來則君輩當之浚枉死也有妾金氏男有聲女年十六者在任所女新嫁爲羅生妻羅父方守鳳山聞敵聲息走人請歸金公曰敵已入塞吾不可以出私屬不許城未陷宜春公又欲使有聲齎狀詣京金公曰此生道也亦不聽及城陷與之俱死贈左贊成致祭旌閭有聲贈叅議妾與女並旌門後因筵臣建請贈謚曰

壯武同時死事諸君若李江界秩滿歸路到州城值
兵亂慷慨挺身曰十年在邊不可負國恩而圖生自
請爲別將城陷所率偏裨僕隸皆從死無一去者贈
右贊成致祭旌閭命有司廩其家若宋永柔當其領
兵赴召縣吏請送代將宋公曰兵是大事自領赴兵
使以下皆曰君是文官胡自來宋公曰臨難忘身獨
武夫事耶衆皆歎服使之草檄諭衆辭意激烈觀者
感動及城圍合脫鐵衣挂樹曰城必陷我必死衛身
何爲臨死手書遺子有男兒事業今日決矣八字餘
無一言贈禮曹叅判致祭旌閭給祿三年官其二子

若全龜城張价川金泰川尹博川宋孟山諸人身後
恩波想必均沾於揭厲而子孫無聞記載不傳咸應
秀城守時初爲東營將年七十公閱其老使出去避
兵則泣曰旣受國恩當以死狄况主將在此何敢獨
去公壯其志節使監軍籍金彥壽代爲東營將韓德
文爲北營將城陷時與梁晉國林忠恕等同死咸贈
戶曹佐郎金贈兵曹叅議並旌閭復戶 今上丁亥
因州人上聞韓梁林三君亦贈訓練院正旌閭復戶
嗚呼當其時灰身於烈燄併命於白刃積屍城中無
非烈士而官任姓名尤著人耳目者宜春公之下又

有此十四人其後氓俗追慕每歲首春私奠於路陌
顯廟庚子別降香祝以禮賜祭 今上五年奉命宰
臣以士民之請歸奏朝廷許立祠宇於殉節之地越
三年祠宇成堂廡有序從配以秩朝廷遣禮官祭之
賜額曰忠愍龍川府使李希建之效死於雲巖其時
同地又州境亦列享于李江界之次云宜春君之曾
孫崙佐幕于州營巘分符于三和相繼來謁展其孝
思赤白之未飾者旣治新之又謀所以樹牲繫而垂
顯刻公之孫淵以余爲辱在同宗之列請述以文而
系以詩乃作詩曰

睠彼安原國之西門屹屹高墉前帶長江建茲祠房
以饗國殤毅魄忠魂不孤有隣玉節牙璋竹符銅章
鞭弭韃橐鞞袴握刀想像冥蹤宛然舊容雲車風馬
後先上下雷霆並轟日月齊明陸離布濩如或可覩
州民慕義 聖朝卹死恩錫嘉扁禮成盛典俎薦臠
肩樽酌清玄將事無怠期于世世我念諸公當日之
功挫敵全力以城代國節則壯矣功又無二遠比睢
陽雷南許張作詩載石風聲在卽爰褒往者用勸來
也

全羅左水營李忠武公記事碑陰記

李忠武公當壬辰倭寇以全羅道左水使截海擊賊
仍兼三道統制使終成露梁大捷之功而以身殉之
時柳公珩以海南縣監寔佐其軍贊畫督戰忠武公
一中丸死柳公六中丸生兩公于斯役也雖有官位
之差死生之異其於再造中興實並有力焉賊退事
定後朝廷以爲全羅左營實忠武公首事之地軍民
之追慕尤深命建廟宇樹穹碑凡以獎偉烈慰民望
不可舍此地故也時柳公亦自全羅右水使陞拜統
制使爲之經紀建碑之工未訖遽移黃海兵使得石
于江陰出江浮海而運致之後人繼事碑旣成又豎

小碣于其側具建碑始末柳公之曾孫星彩今又按
節此營遠慕忠武公暨其先祖之遺蹟且念其先祖
盡心碑役至於移職而運石以迄于成者爲之重新
碑閣刷洗刻文如始建時焉又以碑側小碣字畫漫
漶缺落將欲琢磨改鑄以示久遠云嗚呼忠武公之
身死而功成柳公之幸不併命克相後事水使君之
繩其祖武繼志述事皆可書也是爲記

露梁六臣墓碑

戊子

惟昔 端宗大王之遜國也忠臣烈士爲之效死前
後者多而南秋江孝溫作丙子六臣傳行世故有言

及遜國時事人必以六臣稱焉自京城迤南十里越
露梁津岸上有五墓各有短碣表曰朴氏之墓俞氏
之墓李氏之墓成氏之墓成氏之墓而不書其名此
於六氏有其四而無其二然其居民相傳爲六臣墓
者其來已遠云成墓之有二者以揔管承旨父子併
命河墓則在嶺南善山柳墓則獨不聞所在意者六
臣之死也其族夷矣義故收以瘞之冒禁周旋勢不
無難易之或異是以或能歸骸於故鄉亦或終不得
掩土耶且聞揔管墓又在洪州故鄉或者曰刑禍之
後各藏其一體而然如果信也亦足令人釀淚於千

秋矣且此地成墓之有二近古者舊耳目相接傳說可据而不知何年有權貴人築莊江上其近丘墓之有碑碣者悉去之權貴人敗後有人收拾舊碣於踣碎之餘復豎之然其未及復豎也多有追瘞之塚間於其間成氏一墓混不可辨且失其碣故今之可認爲成墓者只存其一以此推之當初四氏之葬也河柳之墓亦安知不在此中而歲遠失處或如成氏之一墓耶嗚呼悲哉六臣死時子姓無遺類唯朴氏有遺腹孫混名隸人得免收司數世之後朝廷始愍忠錄用至六世孫翊贊崇古以爲露梁之墓雖以其無

籍可攷爲疑然而五碣四氏此足爲徵又豈可以有
氏而無名不信而不省也遂增其舊封易以新碣且
乞文於許相公穆名之曰六臣疑塚碑文而未及鐫
石 今上之五年己未 上閱武露梁因諸公卿陳
白隔江望墓喟然有感命封植其塋域中外多士作
興於斯就其墓旁剏建祠宇並享六臣十七年辛未
上展謁 章陵輦過墓前又命復官致祭仍賜祠額
曰愍節嗚呼前乎此則所謂六臣墓者只是陂陁之
抔土剝蝕之片石江翁津吏往來指點相傳之私說
至于今則事登於公卿之敷奏禮隆於 天矚之再

及既有封植之恩命矣又有祠宇之啜食矣又有爵秩之復復矣又有禋祀之特降矣又有華扁之昭揭矣朝家所以表章者光顯如此而乃於其興衰之遺墟猶置之疑信之間使忠魂毅魄長受其黜闇於荒草寒煙羣燐衆啾之中則不幾孤當時義士封土樹碣之苦心又不幾虛今日 聖朝表忠伸鬱之曠典耶朴公之靈亦豈肯曰余幸而有遺紹之血屬耶崇古之孫清安縣監慶餘深以此爲懼謀于諸長者欲備紀茲事之始末建碑于神道來請銘于余余以耄昏辭不獲乃曰然露梁墓之爲六臣藏可信而不可

疑誠如而祖之遺意而其在昔 莊陵位號之未復也猶有所忌諱不敢索言今則不但朝家於六臣快賜獎勸永樹風聲 莊陵之復亦既有年今於露梁墓獨不可以疑爲信鑱堅紀實祛舊晦而成新顯晰當今而昭久遠乎於是乎遂序其事而系之銘曰

西湖南岸有墓纍纍各有其表五碣四氏傳道自古六臣所閱其氏有六此具其四禍發之際事出慕義不書其名知有所以云何後人有疑于是雖緣無籍實慮有忌幸會 聖朝有感天意褒忠獎節靡有不至白日之光洞徹九地曠度大德不可擬議昔者所

諱今悉無避言念列表不泐如彼又加封植其盛若
此人之然疑汔可已已醉琴有後並主六祀傳至六
世曾修墓圯且述碑文猶斬直致爰及頃年 莊陵
復位崇岡若新象設咸備一體 君臣事豈有異奉
茲降魄尤宜無貳明言顯刻用眎千禩庶幾英靈終
焉此萃

雙樹山城記事碑追記

昔在天啓四年甲子之春逆臣犯順 仁祖大王南
巡狩乘輿在道而捷書奏 上至公州臨山城御雙
樹亭而獻馘至其時觀察使臣李命俊牧使臣宋興

周請碑文于右議政臣申欽上贊國家討除亂逆之功烈下彰茲地衣被天光之榮幸而顯刻未及成其後四十餘年觀察使臣閔維重旣治石將載辭而且未之果又過四十餘年今觀察使臣李善溥念駐蹕之旣遠慨遺蹟之將堙於是乎取前具之石鑱舊撰之文樹之亭下用昭眎于久遠噫自甲子至今日八十有五年矣李觀察乃能修舉未遑以藏茲事藉曰茲非朝家頒布教條於方面考課其功能者然繹思戎功揚厲鴻休於戲前王不忘亦豈非藩維之臣承流宣化順長道屈羣醜之大端耶九萬旣書碑

文且附記碑事首尾于左

高下島李忠武公記事碑

已丑

昔在 宣廟丁酉歲故統制使忠武李公以爲兵興
事殷糧餽最重審察形便得羅州高下島凡戰陣餘
穀山野運米悉令停侍于此募軍入屯置別將以主
之蓋此島處海路自南迤西之地右引嶺南左達京
口近可以給食軍前爲鏖戰之資遠可以獻饗 行
在爲救匱之用其爲國家深謀長慮非偶然也而時
移事往蹟隳規壞別將雖存舊號軍民已多逃散近
年又移鎮於唐串旣失控扼之勢又少財穀之蓄本

鎮遺民爲慨然咨嗟者久矣公州武人某者以吳統
制重周幕裨差本鎮別將以軍民之意稟于主帥欲
載事于石樹之于高下島初設之處以復忠武公舊
制纔訖治石吳統制解職某裨亦歸然軍民喁望之
情終不可遏工役餘財亦可充鑄鑱之費所未得者
唯記事之文耳爲此來謁于余余作而歎曰有是哉
忠武公經遠之計也自古危難之際戰伐之所以必
勝國家之所以復振未嘗不賴於積粟趙營平金城
之碎羌在於湟中之屯田唐德宗奉天後濟饑在於
韓滉之輸米公之設鎮其意固在於斯二者矣或曰

公方與賊交鋒軍食日急其爲聚穀饋兵固人之所
共見至於貢獻朝廷人所未喻今何以知其必然也
余曰唯唯否否蓋嘗見公遺事其所區畫不但爲目
前事公之初受節於全羅左水營也聞大駕西狩
別貯精米五百石而封之曰主上越在龍濟箕城
之賊若又西突則駕將渡鴨綠矣爲吾之職當以龍
舟浮海迎駕仍圖恢復雖或不幸君臣同死我國
之地可也觀公此言公之精忠壯略豈但爲不乏軍
興而已豈止於拘守一職而已不然閑山古今之間
旌纛之所臨顧眄之所及設屯儲糧亦足爲急時取

用何必於離營之遠轉海而西指京都而設此鎮哉
某裨以乘障之士在遞任之後乃能興起公遺風發
明公初意必欲使後之制將重有所修舉今之鎮民
永有所瞻慕其亦可尚也已

墓碣銘

兵曹佐郎鄭公墓碣銘

已酉

公諱載海字汝振東萊人也東萊之鄭故爲大家至
文翼公以德望相中廟與道進退邦國是賴暨子
孫若曾皆法象其賢繼登相府積累之盛近代無比
今其遺風流教有可觀焉公於文翼公六代孫也祖

諱廣成刑曹判書考諱萬和禮曹叅判公以崇禎壬申生生有至性甫成童侍親疾如成人日夜不懈一家長老咸嘆異之旣知學聰穎出羣博通經史如誦已言稍長益謹飭修整行浮於文甲午成進士游太學操履確而裕言議正而遜諸生盡傾願爲之交師長亦敬重不以他弟子視之丁酉闈科選入槐院以假注書入侍舉止中度記事瞻敏上頻顧而動矚聞者榮之己亥九月除注書例兼春秋館而公伯父方以首相領史局在例當避政院稟改再除又辭遞亡何膺薦翰苑亦以避不拜辛丑相君辭位始授注

書俄移檢閱遷待教相君復相公又遞壬寅由奉教
陞成均館典籍轉司憲府監察時叅判公觀風嶺南
公解職往覲在道拜兵曹佐郎辭不赴十二月猝中
疾竟不起享年僅三十一訃聞于京師知與不知咸
失驚悼傷或者至於隕涕壬寅四月歸葬于水原府
西葛谷之原余嘗記乙未秋以諸生入太學見公於
羣章甫間接貌聆音固有以異之明年余占科謁文
廟公猶在庠舍與之言如前歲無自歉意又明年公
繼登第新唱名過余與之言如前歲無自足色於是
余三見公而三服意公將申其所負昌大興行克繩

其祖武豈知天所以賦公其美如彼其短如此哉嗚呼痛矣公娶節度使金逸女生二男一女男曰是先賢而有文次曰復先女未歸復先年始舞勺從余學於書有音近公諱輒泫然哽咽余以是知公有未食之報不羸之成也一日復先以公弟載漢所爲狀授余曰先君之墓尚無表今將治石而文之宜有以徼惠於先君之素相與而兄是先守祖父喪斬焉在衰經不敢躬造請吾幸朝夕獲私敢以屬余旣辱知公而悲其蚤世又哀復先之言不忍辭謹叙而銘之辭曰

於汝振疑疑遂遂本孝謹以餘力學其文郁載美世
奕年不永位以不稱歸諸命既厚其積享之薄委祉
似續述墓辭以示無期期勿隳

黃善士墓碣銘

武人黃元立一日踵余門而授其祖父善士之狀而
傳其父宗翼之命而曰先人之亡于今六十有餘年
矣先人既不幸生不能有施於世沒又不得有聞於
後是重不幸也可不悲哉今以狀相浼願載子辭以
發幽光且吾與子實權氏之自出子其或者聞吾先
人名而哀吾而許吾是以敢請辭不獲遂受狀而歎

曰善士之善多矣不可悉矣乃最而次之其事親也則生盡誠死盡哀前後廬墓晨昏上哭未終喪未嘗一歸家與其妻對面嚴敬有如此者其從師也則少就鄉先生尹公學相去五里餘朝夕冒泥露步履往來窮年歲不怠勤苦有如此者其友愛也則一兄一弟二妹接屋而居和翁至老終無娣姒之違言淳篤有如此者其自飭也則少赴場屋一遵條制不挾書操紙筆而已以方寸地賦天人災異策再冠多士考官尹覃休大激賞送馬相要辭不往俄以病謝舉業專意向裏學聖賢遺書靡所不究要必體而履之至

於博奕貨利嬉游之事忿爭辨詰鄙俚之言不但不
發於口且使不入於耳不但不畱於心且使不接於
目唯閉門掃几兀然端坐厲聲讀書若出金石以終
焉其華實本末之備有如此者其他喪室三年後娶
父母沒生日不置酒冠服不逐時世裝皆足以厚倫
理敦風俗世人之所忽而善士之斷斷服行者也且
少時育於父母不異家無私財故每歎養親不能使
親不知此於余心尤有戚戚焉邑宰趙公璨慕悅其
風贈以詩有村南善士居之語善士之稱蓋繇此云
諱德基字景履其先懷德人也曾祖以上簪組連倫

祖友參成均生員考潤霖宣務郎妣清州韓氏宣略
將軍瑚之女生于嘉靖乙巳卒于萬曆辛丑窆于木
川細城之原初娶學生閔希曾女生二女適忠義衛
鄭承宗生員崔士慎後娶忠義衛權愾女生一男一
女男曰宗翼女適士人呂光立宗翼生八男元亮元
立元相元履元龜元度元老元八而元立登武科女
適士人朴世樞鄭承宗一男曰禧崔士慎一男曰乾
發三女皆爲士人妻善士之沒也宗翼纔四歲養于
崔氏姊寒岡鄭先生謂崔生曰子之舅善人也天必
不絕嗣保其遺孤責在子矣宗翼終克立有子八人

噫善士於此可以無恨矣銘曰

孟氏之論稱善士有三國與天下繇德施之咸黃君
遜鄉名與之潛生有可欲沒有餘慶譽于君子其言
可證銘于好辭厥聲維永

贈司饗叅奉崔公墓碣銘

乙卯

九萬有先執友曰今開城府經歷崔公公一日以其
先公之狀授九萬曰吾先人實有至性純行式於家
及於人而旣無位年又不稱吾以是爲痛焉今幸潛
德幽光上聞於身後得蒙揭厲之恩而墓刻無文無
以示諸後吾以是爲恨焉吾年二十有七先人棄諸

孤凡平日言行在吾未有知之前者聞之於長老在
吾既有知之後者得之於耳目之濡染謹記而藏之
欲託之言之可信於後者以至于今未果吾深懼其
久遠而終泯也是用請銘于子九萬以不敢辭不獲
命遂受狀而叙之公諱尚高字士守始祖曰永奎本
水原郡人麗太祖之南征首義助順麗祖嘉之升郡
號爲州自此冠冕相承爲大姓有諱應清不仕諱儀
部將諱慶元訓鍊院判官是公曾祖祖父也判官公
嘗佐北幕值壬辰之難叛賊縛官吏與倭幕府十九
人盡在縛中以次斬至判官公賊中一人大駭曰此

善人不可害也解而去之推此以言其所以教於家者可知也母曰昌原孔氏將仕郎誠之女已卯名臣大司憲瑞麟之從孫以萬曆乙酉生公甫八歲奉母夫人二妹一弟避地湖西時當兵荒道殣相望而判官公在北未還吉凶不可知二妹又繼歿孔夫人日夕搥胸扣頭以必殞爲期公哀請不得止見孔夫人一搥胸則已三之一扣頭則亦三之以至血流淋漓孔夫人大感傷抑情自保得無他而判官公旋亦免難歸其至性有如此者稍長學禮於姑夫南公應井南公以禮學名一時舉學行者也戊申歲判官公疾

亟公醫禱無不至而斷一指出血以進及遭喪歸葬于楊州故山仍居焉家窶益甚而奉養孔夫人甘旨無闕或出外遇一味之稍可口者雖蔬果之微不忍自食必袖歸而進之鄉里感歎撰其行薦之以朝無引重者尼焉歲丁卯孔夫人有疾適虜兵大入至平山朝夕當及家而公方侍疾不爲避兵計虜因議媾不時進而孔夫人竟不起疾歛殯安厝必誠必信不以繹騷震驚有陵節焉隣里親知竄伏山谷聞之感動悉來會弔觀葬者數百人守制哀慕視禮有加幾廢明者半年自失養二親如得異饌不忍食必分於

隣老曰猶吾老也吾則雖欲養無及矣嗚咽不已有弟曰尚豪少有氣能文辭不幸得心疾頗失常度公保之如嬰兒下之如父兄務以順適其心醫藥飲食必親自營治不憚勤劇不計有無其純行有如此者平居無故未嘗不讀書至晚歲猶日有課程尤用力於禮經而必以身履訓諸子甚嚴侍左右少有怠放輒厲色以臨之待悚懼改容然後已勸學孜孜或誘或警而必以身教在鄉黨雖逡逡退讓而別白善惡處之截然其善者固已薰而善而其惡者亦畏而服悔罪獻誠無所恨望其式家而及人有如此者甲戌

八月卒于家葬于何山之陽坐艮之原卒後十六年
已丑鄉之士大夫慕公之遺德咸一口言曰崔丈人
之行不聞於世此吾等之過遂撫其事告于州州上
之道道上之朝特贈將仕郎司饗院叅奉以旌其行
配漢陽趙氏漢山伯仁璧之八世孫學生琦之女後
公三十八年年八十六卒葬于公墓之北數里許紙
洞坐甲之原丈夫子五人長孝常未冠而夭次卽經
歷公名孝騫克承先訓績文闡科歷郎署長諸寺屢
典郡邑有冰檠聲次孝仲死兵於丙子次孝宣次孝
瞻女子子二人長適李成憲次適金洞經歷一男勸

舉進士選授 英陵叅奉有文而天三女士人具徵
生員朴弘祐武科金燦側室一女黃著耆孝宣二男
勁勛孝瞻三男勛務勝四女閔聖濬具衡餘未行李
成憲無出金河三男慶裕慶祉慶禧四女郭萬雄李
震傑李原卿一未行勛男二叔雲叔雨叔雲男二女
一叔雨男一皆幼銘曰

行孰爲大事親是已人亦有言莫如教子事之以孝
教之以義善積于躬慶流于嗣存而窮約沒而哀榮
天之勝人既定乃明有不信者請徵斯銘

驪州牧使權公墓碣陰記

丙辰

今上元年正月御經筵承旨鄭維岳啓曰臣嘗在湖
右備聞故牧使權覲事親至孝宜有褒命校理權愈
繼進以請 上下其事禮曹啓曰本道曾以覲孝行
啓聞朝廷有曰覲純孝出天定省之節甘旨之供特
其常事而侍親疾嘗糞斫指當親喪廬墓啜粥及其
後喪年已衰老而追慕執禮一如前喪鄉黨敬歎欲
聞于官覲以誠止之故鄉人亦感其意當覲生時不
得上聞云且覲子故別坐諒進士謁並有孝行列名
以聞諒命贈職謁命除職唯覲以事久遠見寢今筵
臣儒臣合辭陳啓實非偶然覲孝行明白旣人所共

知宜旌閭褒獎俾有觀感 上可其事禮曹奉旨下
本道乃於乙卯三月某日旌公舊居洪州某里之第
曰孝子故某官某之閭嗚呼公積善累行有不可掩
之實故沒而愈稱久而愈彰恩徹泉塗寵表鄉閭善
人受報於身後果若是夫且父子三人至行相繼前
後褒命徧及存亡此在古所罕聞而況於今世乎余
觀公之後類多文行益熾而昌法象其賢者將不止
其二子而已善人之貽訓於子孫又若是夫尤齋宋
相公實銘公碣而文旣上石始有旌閭之命故俾余
識之將繼刻其陰云

通德郎林公墓碣銘

丁巳

有士人踵余門而求見者曰林泰齊以其父茂之命
命余曰先人之葬今三十有四歲祔先妣亦有年而
表墟無文恐無以飭穉昧于久遠敢以浼余謂泰齊
曰吾之生也後不與而祖接而而祖母吾之三從姑
吾聞之有素其何說之辭謹受其狀掇其語爲銘曰
林望醴泉幹始仕麗位極平章貞平其謚自茲以降
代有聞人毓其英華奮發者椿七賢文會豔稱西河
入于我朝亦克承家瑩官主簿惟解典庫世均別
提圖畫之署葬于沔陽仍世其土有子曰琛主司贍

簿是生應禎選登國庠有道無鳳身晦名彰澍繼厥
緒令于文義厥媿惟鄭公實其嗣名曰秀栢字曰直
卿少則多譽長而有成凡公之善欲悉則支舉其二
三餘可類知蚤游京師見知名卿迭薦于朝武爵是
嬰公非所好視之若浼拂袖徑歸無意需世癸亥之
春糾義有徒天星散落請公與俱公曰不可敢貪天
功避貴辭榮甘心固窮丙丁避狄士女萃島持其金
玉乞公所窖公還其齎悉施以粟卒以全濟繫公之
力甲申之歲涂月五日公疾不起年五十八才莫世
用壽不稱德何賦之豐而命之嗇配南我姑曾祖彥

純官惟承旨與我同根祖楫考炯縣監叅議端莊淑
靜實宜實似孝于尊章敬于君子奉先逮下訓子敦
族閨門之內咸協于則後公之歿二十三載壽七旬
八廼棄人代馬山西酉原禮從魯祔二男子子曰蓋曰
茂女子子三長則李垠次李時楷叅判其官其次金
偉又一側女蓋男泰元泰亨武舉泰貞聯榜庶有四
男茂男泰齊庶出有三李垠之息仁錫義錫李時楷
生緯長縉長偉胤四愚省進明弼諸孫女幼多不可
悉惟公平生簡重整飭寡於言笑操持有確行備諸
已惠及於人慕遺鄉邦慶流後昆有子克孝丐辭載

石曰最其迹永示無極

僉知中樞府事張君墓碣銘

乙丑

今上九年癸亥朝廷議進用西北人金丞相錫胄啓
于上曰陽德縣監張治世故僉知中樞府事遴之
子遴以龍川人當丁卯之難倡義力戰受知仁孝
兩朝今其子治世歷職內外不墜其父教今欲拔擢
西人激勸邊民宜無過治世者上許焉授都總府
都事最選也嗚呼方今西人之在仕籍亦多朝廷之
所顯用必以治世爲先此豈謂他人舉無治世比者
哉朝家所以賞延于世樹之風聲者然也歲乙丑余

回自燕京治世遭母喪纍然衰服迎于道泣而言曰
先人之墓旣祔母矣猶無以爲刻敢以請按狀君字
君擇籍長淵七世祖文學弼謫龍川家焉考諱希說
贈工曹叅議妣盧氏訓鍊院判官德男女君生於萬
曆丙午弱冠遭兵難府使李希建赴敵死一邑無主
君結宗族鄉黨數百人激之以義保聚村塢以散亡
烏合之衆當鐵騎風雨之勢出奇制勝斬馘無算賊
衄而退卒全闔境士女數千人檄島天將目見戰功
奏聞 帝庭餉以米布乘賊間奔問入朝 仁祖大
王面加獎歎卽除中部主簿俄拜楸坡萬戶賜弓劔

宣醞慰勞而遣之且使挈妻子赴任甲戌差吾老梁
權管丙子之難合兵守滿浦丁丑遞歸 孝宗朝李
丞相景奭謫白馬城還薦于朝癸巳除高山里僉使
捕白額之爲民害者三事聞陞折衝階且有秩滿除
京職之教乙未除衛將丙申特命授僉知中樞府事
引入後苑試射者再歷問丁卯討賊終始及關塞險
易邊兵勇怯之狀奏對輒稱旨有酒肉之賜弓矢橐
鞬貂帽之資政曹首擬肅川府使 上下教曰張遴
勿擬於外職蓋 聖簡別有所倚也未幾自禁直出
疾暴亟 上特賜醫藥丙申三月九日不起疾 上

命有司給喪布棺材命同僚主治喪事命三道監司
護送喪柩別賜素帳油氎行喪之具噫觀於身後之
加恩其注眷於平日可想也際時而無壽不盡其才
用惜哉配將仕郎朴擎天女生五男一女長宣教郎
五世次進勇校尉文世次廸順副尉與世次折衝僉
使處世次卽治世女適武科折衝文昌業內外孫曾
三十餘人銘曰

昔歲在卯維西有難兵及安興守死民散君以良家
奮臂糾旅遏其蹂躪保我士女以弱制強轉敗爲功
事聞 帝庭餉資維豐穿賊入朝 聖祖色獎初官

京部旋扼邊障逮于孝廟又承殊眷職親宿衛對
密禁苑何策之長何年之促隱卒之典徹于幽窆揭
厲之恩延及其胤有欲忠者寧不相勸法興之山維
君所藏嗟我西人觀此銘章

同知中樞府事鄭公墓碣銘

丁卯

公諱縑字子章光州人也自高麗三重大匡門下贊
成事諱臣扈世有顯人諱熊司憲府執義諱應奎全
羅左道水軍節度使諱演同知中樞府事贈戶曹判
書諱興門歸厚署別提贈戶曹叅判是公之高曾祖
禰也妣察訪成八元女以萬曆戊子五月十三日生

誠孝出於天性侍母夫人疾刺股血以進及丁憂歠
粥三年遭後喪年已衰而執禮如前居廬墓側朝夕
上哭幼時曾受撫養之恩於無後姨母生養如親死
則喪以心三年祭以班歸宗家鄉服其行當光海時
主廢母論者居止近日造門欲得公一謝而終不
謝爲其未已也盡室歸鄉斷迹城市公行實篤志實
確然逡逡退讓內而不出不欲人之聞之也故人亦
鮮克知之嗚呼不如是其何以稱厚德長者哉仁
祖朝以吏曹判書鄭經世禮曹判書徐洧薦授童蒙
教官不就復拜冰庫別檢陞司憲府監察出山陰縣

監以異政再蒙表裏之錫超通政階除陝川郡守有
去思碑以高第陞平山府使又拜安岳郡守告病投
綬築室於駒城琶潭之上揭號歸來以佚老焉以年
八十陞嘉善階拜同知中樞府事俄命陞一階爲嘉
義越六歲以癸丑九月終于京第十二月葬于廣州
治南無甲山負亥之原配海州崔氏主簿潑之女高
麗侍中文憲公冲之裔也以婦德稱于宗族先公十
年歿葬與公同封而左壙男長壽一次壽先次壽碩
女適縣監李敏政壽一三男敷敦敎一女適尹儀壽
先一女適縣監李明鎮壽碩一女適權拔曾玄又如

千人敷以武科進陞折衝階方受任於中外銘曰
我修我行匪求人知我守我志匪名是希我不求知
薦剡交騰我不希名恩褒相仍惠則在民報厚于躬
自天申命年高位崇委其餘祉子姓其衍凡厥善人
宜用爲勸鬱鬱高岡同穴有藏顯刻銘章永示茫茫

公州牧使金公墓碣銘

戊辰

余自幼少時稔聞金公孝誠當光海朝以儒巾抗章
請斬三賊臣未嘗不擊節增氣稍長又得公應科所
作歌徹愛君賦讀之詞采曄然有足觀者以此雖未
嘗拜公素知公有質有文彬彬君子人也今公之孫

震奎以公之碣銘託余余以爲銘公可無愧色謹受其狀而叙之公字行源系出新羅國姓籍光州自麗朝以來冠冕相承爲世望族考諱秀淵官襄陽府使贈吏曹叅判妣金海金氏贈左承旨希龍女公幼有異質有老成名年二十九中生員歲乙卯賊臣鄭造尹誣李偉卿等阿光海意倡爲讐 母后之論李丞相元翼有匡拯言罪將不測公發憤涕泣將率同志陳疏親黨固止之公若不聞也及期同約輒散去凡三易日始紉若而人詣闕誤入臺廳臺吏呵之曰臺官且至公曰吾爲國方欲斬爾臺官吾死且不避安

避臺官見者皆驚疏入不報館學相繼投疏請置大
辟下禁府將鞫問會有死囚上變廣引當路人故急
於自救寢鞫事竄吉州遷珍島凶黨有崔公望者嘗
疏請殺公及任全羅都事必欲害公將渡碧波汀輒
爲風浪所阻不得逞癸亥春 仁祖改玉駟召以義
禁府都事道拜清安縣監連擬持憲佐幕乙丑辭遞
丙寅以戶曹佐郎兼管號牌事丁卯從駕江都大
妃遣中使勞賜酒食念乙卯事也除金溝縣令本曹
啓畱戊辰陞正郎與堂上有違言左授槐山縣監又
與兵使不合棄去壬申拜沔川郡守癸酉遞歸甲戌

拜繕工監僉正移漢城府庶尹罷復刑曹正郎轉軍
器寺僉正遷中樞府經歷未幾遷授器僉丁丑拜礪
山郡守已卯陞南原府使言路受人碁劾公上不
許公不辨投綬歸辛巳除竹山府使癸未罷歸甲申
除公州牧使丁亥以討賊功陞通政階拜曹司衛將
出錦城縣監失方伯意遞歸已丑拜清州牧使庚寅
坐北使策應未備有拿命削職叙復五衛將辛卯除
漆谷府使不赴還拜衛將疾病却藥物自力至正寢
易衣正卧而逝春秋六十七公內行純備晨必冠帶
謁于家廟居官清慎凡歷九邑民皆刻石以頌之文

藝華敏拔出流輩發解輒居前列而終不登名於一第發軔之始名通清顯而爲貴近家子弟修郤者所尼晚年李尚書植李相國時白交薦于朝將大用有先除憲職之議而李尚書適去位不果嗚呼凡此豈非才制於命故耶公之莅清安也有貴近家二奴在縣境倚依侵奪發吏捕不得公自往縛致徇一境杖殺之甲申聞皇朝覆亡與宰臣書曰宜有縞素之舉以寓思漢之心雖無北極朝廷必有南渡君臣天意人事未可遽絕事雖不行聞者韙之配韓山李氏禮曹判書增之孫兵曹佐郎慶流之女與公同年生

後公二十二年而歿其隨公任及歸戒婢御悉還器
用之取辦於官者及家吏以行厨用餘獻却不受曰
此非公志也從子養專城者三恒以二樊籠隨身請
易之不可曰吾於夫子時徧諸邑三十年所隨唯此
物今人與物俱老何忍棄之噫觀於此亦可以知公
之教也公以寧國從勲例贈大司憲初與夫人異窆
歲戊午並遷合葬于麻田郡青田洞先塋之下一男
世鼎文科承旨四女生員安之望錦山郡守邊命益
金化縣監辛恒學生權勲承旨有二男長卽請公銘
者季命奎内外曾玄數十餘人銘曰

不位于朝任世之憂臨于鼎鑊甘以身投在夜爲燭
亦晰于幽扶倫樹紀身阨名休 聖作物覩褒召先
及 長秋饋食中貴是押歷官內外恩榮且洽有屈
必申如支之合才之旣優命則猶靳胡不公卿俾悉
其蘊將公矯矯不枯不槩抑時之隘材大難奮瞻彼
青田惟公之藏旣固且安後嗣是昌我作聲詩載其
遺芳刻于貞珉庸眎茫茫

掌令趙公墓碣銘

庚午

趙生鳴時以尤菴宋公之狀授余請其先君掌令公
之碣文余於掌令公世好也雖不文其忍辭諸公諱

爾炳字景章楊州人也在麗朝有判院事岑此其鼻祖也入我朝有領中樞府事文剛公末生此其大顯者也高祖諱季神曾祖諱訥祖諱之柔三世皆潛德不出考諱相禹號時菴師事沙溪金先生講禮以篤孝稱於鄉里仁祖朝抗疏論追崇非禮不報華使來以白衣與僨幕之選自謝歸孝宗朝以學行薦拜齊陵叅奉不就妣晉州姜氏僉知中樞府事贈左議政籀之女歲乙巳顯廟幸溫泉公鄉也郡中父老咸以叅奉公至孝聞有旌閭之褒以公伯兄爾後仲兄爾重賢孝繼父行聞並有除官之恩以公

叔兄爾翮方喪至行聞有贈爵之寵公又登行宮庭
試科唱名之日攀花拜墓墓去行宮近鼓樂之聲徹
於內衛士禁之上特命勿禁盛美殊榮一時舉集
于公家父子兄弟烜赫幽明茲豈非積善累仁之報
歟公以崇禎甲戌歲生闡科選槐院出濟原察訪陞
典籍拜司憲府監察工曹佐郎移戶禮曹出燕岐縣
監遞拜兵曹佐郎陞禮曹正郎出黃海都事擢拜司
諫院正言遞以敬差官檢覈湖南田政拜兵曹正郎
海運判官司憲府持平陞掌令遞拜成均館司藝復
拜正言掌令出沃川郡守以大夫夫人憂解服闋拜成

均館直講出海南縣監以掌令召疾遞復拜司藝遷奉常寺副正陞掌樂院正復入憲府病不起得年五十配池氏府院君湧奇之後通德郎性淵之女事舅姑待宗族接賓客咸得其歡心公之官内外也未嘗以一毫累公及公疾病沐浴禱天積日不已成痼病年五十四歲丙寅不淑從公葬于龍仁負見山坐午之原男長卽鳴時次鳴道鳴謙鳴鳳鳴國女長適士人姜碩泰次適士人李喜楠内外諸孫若而人公之事親生致其養歿致其哀友于兄弟睦于宗黨非但得之於性且又習之於訓其事多不可悉書凡其當

官盡職亦公所以因本而及末者出於人固宜若言其一著則其佐海幕也鳳山郡有玄水清賊殺其妹獄五父子承款將伏法觀察使要公往審公疑其冤問囚經訊多畏慄承款如初更招發告者問囚之面目與名字取他人假囚服以質之指認既錯情狀自露叩頭服罪言受其妹子之賂而誣其舅卽請于觀察使破械縱囚坐發告者如法一郡大驚稱神明焉甲寅十月嶺南人郭世捷被人嗾上疏朝廷入其說公以正言疏論邪正之辨語多激切士林吐氣坐此被禁推遞職其莅郡邑也寬民約已前後若一皆有

去思或磨崖以頌及卒貧無以具複衿論其始終可謂無愧色矣銘曰

聞昔春堂許公有寄煌煌墨花十有六字詩書遺業清白傳家視民如傷憂國如家此公實錄匪少匪多後雖有善評者其何以復加

副護軍望岳奉君墓碣銘

癸酉

九萬獲罪於朝旣老且病屏處田間人事之不相及久矣有李生世甲踵門而請見曰吾外王父奉君有才
有行而存不得施用於時有年有後而歿不得著聞於世吾以是歎焉願有託於公之文而傳之也余

受狀讀訖而歎曰聰明才敏人之所難得於天者也
力學篤行亦天之所難必於人者也君旣得人之所
難得而又修天之所難必其受天之申命也固宜雖
然年壽由乎天而人不得容私爵祿出乎人而天或
有不勝然則君之有年而無位又何足疑也雖然齒
德之先乎爵爵之有天人之輕重孟夫子已論之矣
此君平日所自樂而不汲汲者後之人又何足爲君
恨也君諱珩字而白高麗政堂文學河陰君文謙公
諱天祐之後奕世蟬嫣而及于近代官位稍殺叅奉
諱延孫郡守諱貴達司果諱裕嘉善大夫諱汝慎是

君四世君生于萬曆丙申歲少通悟從玄谷趙績韓
學與素隱慎天翊兄弟天坡吳翮諸人同門友善以
文學相上下及長勤勉篤摯專用力於經籍至人一
已百幼學壯行等處未嘗不諷誦三復俛焉惟日孳
孳至老如一事父母孝與兄弟友宗族稱焉鄉黨慕
焉執親之喪恤弟之孤皆人所不可及也屢發鄉解
而輒困公車頻入薦剡而不遇推挽老而教授於鄉
多所成就若吳持平翮崔叅判逸皆問字人也年八
十朝廷以壽錫爵通政送西銓拜副護軍又六歲辛
酉感疾數日命子弟治後事正衣端坐竟二夕而終

葬于陽城治南盤諸洞負乾之原配昌原俞氏亦名家有婦德先君三十一年歿窆祔君同兆異室一男時儁四女適元玦元舜卿安憲李輅側生男時萬時儁一男九鼎外孫男女又若而人而請銘者世甲乃李氏女出也銘曰

陽城之山望岳爲尊陽城之士奉君爲賢號士以山名咸曰其然山無運動士處不事然其利益及人不匱凡此鄉人瞻仰在是

僉知中樞府事朴公墓碣銘

甲戌

潘南之朴源於羅祖顯於麗季盛於本朝遂爲塗

莘之門司諫贈領議政文康公諱紹以正學直道名
世大司憲贈領議政潘川府院君諱應福乃 懿仁
后叔父而才進德選非以恩也觀察使贈吏曹叅判
諱東說文章器業爲時所推三世相承以及於公妣
高靈申氏左議政文景公用漑之玄孫同知中樞府
事撥之女也公諱濠字伯游以萬曆丙戌歲生己酉
選上庠甲子除造紙署別提乙丑移翊衛司侍直轉
副率陞衛率丙寅拜南平縣監居五年遞辛未拜扶
餘縣監乙亥遞拜宗簿寺主簿戊寅拜榮川郡守壬
午遞歸鄉里棲遲者久之戊子拜戶曹正郎旋拜益

山郡守辛卯陞拜南原府使癸巳以憂解丙申拜軍
資監正己亥轉濟用監正壬寅復正軍資乙巳復正
濟用丙午以壽陞秩拜僉知中樞府事丁未十二月
七日卒初贈嘉義大夫吏曹叅判用子叅判貴也後
贈資憲大夫吏曹判書用曾孫錦平尉貴也葬于楊
州金村負巽之原公自幼已有老成名先生鉅公皆
以公輔期之竟闕於甲乙之選使梁棟之材屈爲椳
闌之用而止耳雖然亦言其吏績其監南平嚴而有
容不問宿奸不貸新犯吏民畏愛不期月翕然稱治
其監扶餘均田政革隱結設津船罷浮橋正己便民

類如此其守榮川及益山治效益著以最擢授南原
物衆俗獷尤號難治而威束恩撫姦良咸服游徼不
出四境而桴鼓不聞檢覈不及田疇而首實自多公
內行純備遭叅判公憂與二弟廬墓終喪大夫人年
高公亦年及七十而服事左右無異於少時及二弟
自相爲知己晚寓扶安之柳浦鼎立三舍怡愉朝夕
爲終焉計二弟歿始歸京第公罕於游從而其投分
許與若而公則情好之篤至老如一未嘗以升沈位
遇之殊有間也 仁祖乙亥歲朝廷有邊虞命舉佚
才當路諸公欲以公應命公弟大憲公潢曰吾親老

矣吾已委身於朝矣兄若又出爲世用誰當奉吾親者力懇于諸公而止之後被舉者或擢至方伯崔相國鳴吉歎曰向使某得舉其可觀豈但與此君等伍而已耶前夫人平山申氏領議政文貞公欽之女後公一年生先公五十年卒夫人之弟東陽尉翊聖誌之曰爲子爲妻爲婦爲母之道俱有可紀後夫人坡平尹氏獻民之女以萬曆壬寅歲生年五十六卒公之從姪左議政世采誌公稱夫人賢孝宜家二夫人葬並祔公公有四男三女叅判世模僉知世楷典翰李壽仁室僉知林一儒夫人前出縣監世標學生世

格右議政李翮夫人後出側出女二人爲學官李時
得忠義衛李豪男妻內外孫曾男女多不可盡記而
其登文籍居通顯者又若而人泰長以宗孫方爲禮
賓寺正而正長男錦平尉弼成尚 孝宗淑寧翁主
正君以余爲辱知請銘公墓銘曰

問公之地華且宏而觀公之人完且成而誰之不如
不公卿而局於公車又焉程而棧棧枳棘鸞鳳鳴而
仄仄微逕騏驥行而世之掄材固遺英而論公所得
亦云亨而孝友爲政既有聲而不卑小官廼成名而
壽考平康福履盈而子姓繼貴泉塗榮而爲善之報

此爲貞而譬如秋穫在春耕而我作銘章以表瑩而後有考者昧可明而

曹生墓碣銘

孝廟丙申歲夏興君晦谷曹公漢英叅考庭對之文余登其第仍得拜顏於公公捐館後數十年嗣子縣令君憲周以余爲曾見知於公請神道之文余辭不獲遂叙而銘之君之長子學生夏重名在叙中余聞其有至性異才若將有以世其令德昌大興行者而年僅十九而歿余旣悲生之英秀不能永其年成其才又悲君之純明不能俾其子蒙其澤且悲公之盛

德不能俾其孫得其壽未幾君亦未艾而卒生之男
命衡生死時方三歲旣冠娶又歿命衡有一女且終
爲無服之殤自公若君言之生雖歿猶有他子若孫
自生言之血屬殄矣噫其悲矣余自拜公于今四十
年乃見其五世之奄忽水閣成川何若是其促也生
之弟夏盛狀生言行錄生詩文請余爲表墟之銘曰
兄之幼也受書於王考晦谷公之懷中命韻賦詩應
口成章外王考青湖李公一相嘗撫頂而誇客文谷
金相公壽恒卽座題詩便面握手相贈同春堂宋先
生亦言于王考曰令公之家福猶未艾其穉年風悟

見獎先輩如此旣長行誼淳篤志操高邁讀書爲文
辭藻思日新有若水涌而雲興方見其進未見其止
天遽奪其年嗚呼酷哉兄嫂僉知中樞府事李公憲
之女自兄歿有下從之意旁人慰解而寬譬唯在襁
褓中一塊肉日望其成立得續先人之祀今又已矣
一縷之命將絕於朝夕然且有以教盛曰夫子平日
所存諸中者阨於年不得一有所發其人與骨將俱
朽於土中此乃逝者之長恨生者之至慟今叔若乞
銘於言可見信於世者以述幽光以眎後人則庶有
以藉手歸告於夫子盛敢以是爲請余聞其言而悲

之且有感於累世之懿不忍以耄老辭生昌寧人世
德具於晦谷公碑以己亥歲生死於丁巳以其年九
月葬于驪州五龍谷晦谷公墓南坐甲之原銘曰
有承于前名德蟬聯無繼于後烝嘗廢墜得氣之粹
才良質美值數之阨天高鬼惡尚有餘寄貞婦弟弟
乞銘刻石千古不泐

利仁察訪朴公墓碣銘

戊寅

公諱宗岳字君望姓朴氏新羅國姓之一有諱瑀封
屏山君以封受籍卽今之比安有諱瑞生受業於冶
隱之門官吏曹叅判選清白吏望臨一時是爲公七

代祖曾祖諱繼仁宣教郎祖諱希聖府使贈左承旨
考諱峻以純孝聞官縣監攷行迹則有三綱行實言
治理則有表裏之褒妣晉州鄭氏校尉賢慶之女甲
子死直承旨誠謹之五代孫以萬曆乙巳歲生公自
幼趾美家庭又以孝稱於宗族李相國景奭薦諸朝
除獻陵叅奉陞濟用監副奉事遞拜東冰庫別檢
陞漢城府叅軍遞拜濟用監直長陞內贍寺主簿出
利仁道察訪及瓜年至歸于忠州舊居歲庚申七月
卒其年九月葬州治南保理村嗚呼公之行不可徧
舉推其孝他可知也公之孝不可悉書言二三餘可

略也蓋聞公弱冠失怙廬墓三年母夫人有疾斷指
進血得穌此乃先夫人之所曾行者及失恃又廬墓
啜粥以終喪事亡之禮尤致其誠敬晨必謁家廟祭
必親饋食不以年高有懈自五代祖以下初無識墓
之石縣監公有志未果公歷歲經營終成先志有弟
曰震岳遘癘殆公奔入救諸子更諫不回扶護殯殮
皆手親之作訓書遺子孫藏于家世遵焉歲乙亥朝
廷特贈左承旨以旌孝也配豐山洪氏主簿濤之女
生于高華之族歸于賢孝之門與夫子同三年之制
者三致養奉祭咸盡其誠能無違於夫子宗黨以爲

式生後公二歲卒後公四歲葬祔公一男峨有文行
不幸先公物峨有四男一女男長繪山進士次斗山
進士次輝山次維山繪山二男徵遠徵壽斗山五男
二女男徵賢徵賓餘幼輝山二男二女皆幼女適元
斗明有二男二女男萬喆萬赫女長適李喬齡次幼
徵遠在諸孫特有俊才旣冠娶天妻權不食而絕事
聞有旌閭之典與公褒贈之命同時並降遠近覩聞
莫不嗟傷起敬此則雖不可曰積善之慶亦不可不
曰遺教之美嗚呼悽矣余外宅卽公同里余以此得
交於公之胤峨仍得公之內行熟今公之孫繪山以

余爲有累世之懿請銘公墓不敢以不文辭銘曰
世其德惟孝篤受天祐享眉壽位不稱褒有贈委多
祉貽後嗣子姓濟濟節行繼繼銘以記之庶無愧辭

咸鏡北兵虞侯洪君墓碣銘

洪君諱有量字休哉籍南陽鼻祖諱悅佐麗太祖策
開國功臣太師自是奕世蟬聯推爲東國甲族入
我朝有諱貞老以宣傳官從上獵有虎食馬承命
挺往擒跨至上前擊殺之上壯之卽拜訓鍊院
都正於君爲五世祖有諱守得生諱霽贈司僕寺正
生諱德演贈左承旨娶完山李氏永恂之女以萬曆

乙巳生君甫成童失怙執喪奉親以祭以養誠禮咸
至崇禎丙子登武科除宣傳官陞都按府都事經歷
選拜翊衛司司禦從 世子質于藩陽還內歷訓練
院僉正副正掄經則再踐五衛將外莅南海縣令嘉
山郡守全羅道兵馬虞侯加里浦僉使肅川府使羅
州營將咸鏡北道兵馬虞侯安興僉使乙卯卒于京
第葬于水原府治之北梨洞坐子之原從先兆也配
贈貞夫人李氏 恭靖大王之裔孫長發之女生後
君二十年十九歸于君歿後君三年葬祔君三男長
夏昌咸鏡南道兵馬虞侯次夏成通德郎次夏明曾

經全羅左道水軍黃海道兵馬二節度使今方建節
忠清道水營側室二男夏業夏績夏昌無子夏成子
禹載禹平禹平爲後於夏昌夏明子禹澤夏業有三
子夏績有四子君以孤童成家以彊力立身內而典
宿衛周廬外而執羈勒異域受寄於海鎮分憂於郡
符制權於列營贊戎於邊閫秩物效勞餘四十年小
心畏慎如一日終保其令名宜家之則克敬克順訓
子之方以孝以弟又推其食報而未盡者遺諸後人
身後光寵上及於祖考嗚呼豈不賢哉是宜銘銘曰
有美洪君稟厚資良不扶而直無風而翔雖以武進

行則儒素斤斤中外靡有失誤旣壽旣昌寬樂令終
有子追榮源遠流豐刻詩貞石以俟悠久欲考其德
有此不朽

戶曹正郎尹公墓碣銘

己卯

公諱叙績字汝成姓尹氏籍漆原遠祖諱松碑顯于
麗朝官銀青光祿大夫兼東北面都指揮使入本
朝弘文館直提學諱碩輔燕山時以直言流配卒後
選清白吏贈吏曹叅判於公爲七代祖曾祖諱自莘
刑曹正郎贈吏曹叅判祖諱有吉平昌郡守贈戶曹
叅判考諱遇丁司憲府掌令贈吏曹叅判妣貞夫人

龍仁李氏開城府畱守贈吏曹判書後山之女舉五
子公爲第二以崇禎丙子生幼敏悟學語識字勝冠
課製發解輒居前列丁酉中生員進士兩試而治經
學倍文不售赴庭試入彀見扼茲所謂命也夫從門
庇拜義禁府都事換內侍教官以 仁敬后國葬監
造勞陞六品再拜禁都轉刑曹佐郎出通津縣監自
免歸叙拜戶曹佐郎陞正郎出青陽縣監遭大夫人
憂旣吉爲宣惠郎拜工曹佐郎出高山縣監罷還叙
拜軍資監主簿乙亥卒配潘南朴氏高麗直臣尚衷
之後經歷世基之女生于崇禎戊寅年十三歸于公

癸亥卒葬于楊州延曙驛西高子洞坐亥之原及公
卒右壙而同墳有四男一女男長志任方任刑曹佐
郎次志和新闡庭試丙科次志淳進士有俊才早夭
次志益生員女適柳鳳協志任二子敬老敬先志和
一子敬宗志淳二子敬龜敬龍志益三子幼諸孫女
皆幼公之胤志任昔曾問字於余過從相樂仍得習
於公性真而德厚坦然無畦畛內行甚修人無間言
其爲治理安靜淡泊以撓民爲戒以近名爲耻寬而
不弛縱愛而不姑息居無赫赫聲去後常見思平居
罕與人還往門庭闐寂一切外物若書畫花卉之類

亦不經心唯閉門讀書而已其解縣符還也無以繼
朝夕其卒也無以具襲歛其葬也無以營饋奠嗚呼
此可以觀其所存矣以身教家內德亦備奉尊章事
夫子處妯娌誨子女動合禮則且勤於女紅篝燈達
曉黽勉有無以御其窮夫子之安貧自樂夫亦內助
是賴也志任兄弟旣終公喪來請碣銘于余疾病在
苒諾而未副者有年今志任從余於鄉廬謝事之地
請之愈懇不得以昏耄辭乃序而銘之曰
位不稱才年不滿德於身不羸將後有獲從古迄今
斯理不舛銘以質之用勸爲善

僉知中樞府事李公墓碣銘

辛巳

公諱憲字樂甫系國姓六代祖完原君諱恹成宗
大王別子也生伊城君諱壽剛生義泉君諱仁生順
興君諱夢禹生諱璵宗籍親盡仕爲同福縣監登文
科未及遷卒贈吏曹判書生諱尚質文科狀元弘文
館校理選書堂力爭元宗大王追崇竄鍾城放還
途卒配草溪鄭氏文肅公守夢先生曄之女崇禎戊
辰歲生公旬有二日慈夫人見背未及就外傳先大
夫又逝零丁孤苦亦能自力從學十五歲委禽於大
學士樂靜趙公錫胤之門仍受業焉樂靜公期許之

甚重自在儒冠望臨一時 顯廟之入學也選爲奉
爐儒士榮之同春宋先生之誨士于泮宮也推爲掌
議先生亟稱之辛丑除 寧陵叅奉甲辰拜內侍教
官乙巳擢文科歷槐院翰苑己酉 上親臨春塘臺
命題試文官移晷之後命公輟珥筆應製及拆名相
臣啓于 上曰翰林居魁生色多矣命超陞典籍屢
遷兩司春坊玉堂兩銓郎選知製教兼校書館校理
西學教授壬子拜北評事癸丑以舊踐召還更歷政
府郎三司亞長春坊長官甲寅以都廳董 山陵之
役乙卯以勞陞通政階送西除順天及仁同府使並

不赴已未除僉知中樞府事又不拜九月二十七日
不起疾于京第葬于砥平之中元洞癸亥改窆于其
左負壬之原公以清名雅望歷敷華塗風采所及固
足以聳動瞻聆而朝夕獻替日月論思不可僂指而
悉數若言其係君德關時運之大者顯廟末年
相積把握國柄蠱惑上心臺臣論劾天怒遽震
公以獻納屢啓爭執又以修撰上疏開陳其略曰臣
待罪邇列已過陽城之七年而痛哭裂麻臣旣不能
輔導君德尚何望哉且凡民之口猶不可防諫臣
之喙可盡膠乎今削奪之罰及於林下之士移怒之

舉加於已罪之臣此乃昏亂世之所罕有而聖明
爲之耶其言之切直如此而上只命遞職不之深
罪甲寅春仁宣后上賓無賴子上疏以慈懿大
妃不服長子婦服激上怒上令大臣以下會議
賓廳諸臣獻議失上旨相臣諫官並有竄逐之命
公以應教上劄爭之略曰自己庚以來邪議紛紜乃
以服制降等宗統不傳之說播於國中騰於疏章爲
嫁禍士林之奇貨今殿下入其言自戕其股肱自
黜其聰明今日國事可謂棘矣復入對前席苦口極
言同侍諸臣皆爲之懼未幾顯廟昇遐今上新

卽位羣憾蝟起兩司首論宋公時烈誤禮貶尊之罪
將至不測公以司諫引避略曰時烈以草野之士受
孝廟眷遇願忠之誠可質神明而今託禮論乃加以
貶薄孝廟之罪此果可服一國之心爲百世之
公論哉臣目見士禍之迫難望回天之力不可苟
冒臺席請削臣職上下嚴旨遞職翌日又命罷職
不叙自此不復入朝而天又嗇其壽嗚呼痛哉余生
與公差一歲而弱冠論交合堂聯席同筆硯講文藝
往還周旋者十餘年顧余昏愚雖不足以得公之全
亦自謂知公之熟莫余若也公襟懷易直操履峻潔

未嘗拘拘於繩趨尺步之桀度而天姿自然近道凡
於別事之是非論人之得失未嘗以密交貴勢有所
容貸雖並坐對面亦直斥極意而言之然誠意孚於
人人亦不甚相忤也至若奉先恤族之懿輕財好施
之義又有加於人數等者平居靜以守已泊無所好
唯以經籍自娛閒廢以後益加研究充然有自得之
趣所著詩文皆簡質雅馴有若干卷藏于家夫人資
性和順德容婉孌于歸之日已不逮尊章而奉烝嘗
事君子率循典則爲世名門生與公同年卒後公四
年葬祔公墓左男長漢翼進士蚤夭次漢宗生員方

任高山縣監次漢章亦蚤天女判書大提學崔奎瑞
判書大提學徐宗泰進士林世恭沈廷熙曹夏重叅
奉洪重範其壻也漢翼一男肇曾入玉堂乞養方任
楊根縣監內外諸孫男女數十餘人銘曰

何稟之美而年之不遐何養之粹而施之不多雖曰
不遐聞則長矣雖曰不多言則彰矣升者清明杳莫
追矣降者幽翳表在茲矣

藥泉集第二十目錄

墓碣銘

司僕正金公

德承

尚州牧使李公

長英

知議政府事呂公

稱

益山郡守李公

善淵

教官金公

大來

掌令金君

始徽

慶尚右兵使梁公

應涵

慶尚左水使梁公

弼

陝川郡守李公

善基

戶曹正郎金公

弘振

昌城君

泌

司導正崔公

頤英

監察李公

尚弼

同知中樞李公

震白

兵曹佐郎李公

廷麟

蔡集

卷一

...

...

...

...

...

...

...

...

...

...

藥泉集第二十

墓碣銘

司僕寺正金公墓碣銘

癸未

公諱德承字可久姓金氏駕洛國首露王之後麗朝
有諱牧卿重大匡金寧君子諱普門下都僉議左侍
中金寧府院君謚忠簡子諱到門入我朝三司副
使後有諱永堅再闡文科吏曹叅判後有諱光壽通
仕郎子諱希禹成均進士贈司僕寺正子諱盡善義
禁府都事贈左承旨是爲公三世而妣贈淑夫人驪
州閔氏大司成壽千之曾孫判官哲命之女公以萬

曆乙未歲生纔學語已好書有時啼諱長者命受書
卽止啼稍長明悟過人程讀經史之外深究韻書妙
解清濁是以於華語不習而能之蚤失怙恃而能自
刻苦博極羣書旁通星曆諸家靡不窮其蘊奧歲丁
巳登上庠己未闡文科選補承文院副正字辛酉遷
著作時西事日棘接伴唐將於鐵山爲虜兵所圍十
日僅乃得免壬戌轉博士甲子陞典籍移監察時遼
瀋路梗汎海朝天冬至使書狀官臨登船辭疾以公
代之改刑曹佐郎趣裝赴期達 帝京例賜銀段悉
分下卒書冊玩好一無所近備冬煖帽歸時亦給譯

官乙丑除工曹佐郎兼記事官移持平丙寅出慶尚
都事丁卯入正言歷直講司書禮曹佐郎戊辰以曉
解漢語特兼漢學教授俄出海運判官庚午拜戶曹
正郎辛未遷文學弼善掌令兼編修官移相禮司藝
其在憲職當 仁穆后昇遐于別宮有司方議奔哭
之節兩司齊會將請 上乘小輿公獨曰三年之喪
無貴賤一也奔哭請乘輿出於藥房保護之言則或
可也臺諫非其任遂止之往在廢朝丁巳生員狀元
李榮父疏請廢 母暗錄同榜諸人姓名咸莫之知
至甲戌春事始發公上疏曰丁巳榜生員榮父謁聖

日率同榜議同者若而人投凶疏臣預有聞不叅謁
聖旋被削籍此同榜之所共知而榮久暗錄之疏藏
在王府外人不得見晦昧罪名在於身上倭倭冥行
至十餘年之久豈可終不暴白甘爲倫紀之罪人乎
於是同榜沈公之源洪公恕鄭公百亨俱陳疏事下
該曹引其時有獨拜西宮而亦在暗錄者以證明之
政院亦陳啓始白其受誣狀冬拜獻納乙亥以軍器
寺正出牧公州大臣白 上還漢學教授丙子以掌
樂院正出延安府使十二月聞虜騎已過黃州領軍
赴軍前丁丑正月又因統禦使傳令馳進追聞 春

宮大君已發西行路由本府驚遽馳還則已以不及
出待有拿命奪職屏居忠州者十年丙戌始叙授尚
衣院正戊子改司成己丑移司僕寺正辛卯拜軍資
監正間除憲職者亦屢矣壬辰出襄陽府使乙未遞
歸于楊州先壠下戊戌十二月卒翌年二月葬于長
湍治西口井里負子之原前配驪州李氏左贊成尚
毅之女出自名門服習壺儀壬戌四月卒年僅二十
六葬祔公兆之右後配坡平尹氏縣監瑄之女事君
子無違德戊申七月卒壽六十三別葬于府治之北
板浮里負甲之原皆公治命也男府使洪慶女李後

吉教官申泮妻前出男洪命洪範觀察使洪福女縣
監李世瑗朴泰進妻後出洪慶男郡守宇梁畱守宇
杭洪命蚤夭無子以洪福次子宇采爲後洪範男宇
棟宇楠宇植宇枋洪福男宇集序官次而不書再踐
序子姓而不書外孫與曾玄以從簡也後以觀察君
貴贈公嘉善大夫禮曹叅判兼帶如例二夫人從贈
焉公資性方嚴臨事謹慎內行淳備自奉儉約耽嗜
典籍隨處左右輒列古今圖史凡於博奕嬉戲聲伎
芬華泊如也歷仕內外四十餘年而京師不立一間
屋世傳莊土不復廣一區平居語不及貨賄門不見

市井學識淹貫文辭博大所與交盡一時英俊而操
心制行未嘗希合於時尚毀譽榮辱一置諸度外出
入臺閣言議無所訛舛是以以累朝久次終不登
上大夫之列此固當其時持衡者之責而在公則益
可見素履之確庸何傷焉李夫人卽余婦翁之姨母
府使君卽余同榜進士以此余於公雖未及覲德而
承教亦嘗習聞其流風觀察君曾以公記墟之文託
余荏苒之間遽成千古余每以宿諾爲愧今郡守君
命其庶弟宇桓來申請曰石旣具恐後時余於是感
念今昔爲之一涕遂序而銘之曰

年止下壽而福履則安位不甚尊而身名則完有學
有文而人莫窺其蘊有德有行而人莫悉其隱表裏
無異終始不貳享諸躬者嗇而遺諸後者豐亦可見
食報者無窮

尚州牧使李公墓碣銘

惟我定宗恭靖大王脫屣萬乘有太伯之德餘庥
及遠于今三百載子姓益昌有戶曹判書諱景稷議
政府領議政景奭兄弟者出以文行才德迭顯于
宣仁孝顯四朝之際子弟皆法象其賢名能守家訓
公曾祖諱秀光贈左贊成行敦勇校尉祖諱惟侃贈

領議政行同知中樞府事考卽戶曹判書號石門贈
領議政謚孝敏有純孝至行 孝宗朝命旌閭妣寶
城吳氏僉知中樞府事景智之女公諱長英字子華
生於萬曆庚戌自幼穎脫而嬰奇疾廢舉業年二十
三除繕工監役內歷掌苑別提司憲監察宗簿主簿
戶曹佐郎義禁都事中樞經歷漢城判官造紙別提
司宰掌樂軍器僉正漢城庶尹 宗廟令外出通津
慶山縣咸陽安城槐山郡利川鐵原富平平山府高
陽郡豐德府南陽縣通川郡又內而辟宣惠郎者三
外而韓山金浦尚州則除而不赴其在通川引年辭

遞退居西湖小築謝人絕事自娛餘年卒于丁巳二月間一月葬于果川縣冠嶽山北先兆之次負午之原公旣生長德門不離典則且資性敦敏誠心篤摯其所以事長者未嘗不察其幾微先意而爲之議政公年尊時孝敏公從王事內外或不遑晨昏之職凡食飲之寒暖衣被之增減大而賓友之應對細而厠牖之澣洒惟公是委孝敏公之以孝聞於世亦公有助焉其當官理事推此而施焉故所至有聲績或立石而思之當其食於官莊穀有侍幹家者欲以買田公曰爲守宰營產雖用家財亦不可不許以此典

郡邑十數而終無尺土之加解官歸常不給朝夕公
既孤一以事親者事叔父白軒相國嚴敬歡愉至老
如一日其季判書正英與公齒差先後其所以事公
亦如公之事相國焉公於兄弟爲長訓勅宗族收養
孤遺恩義備至人無間言配延日鄭氏相國澈之曾
孫府使宗溟之孫生員濩之女也先公一年生後公
一年卒葬祔公左而同穴焉年十九歸公門高而族
大主中饋久而育子女多凡處親疎尊卑之間吉凶
憂樂之際以情以禮咸適其宜爲世閨範可謂賢也
已男長集成正郎次敏成次九成監察次觀成縣監

次老成叅奉次玄成郡守女長判書趙相愚次承旨
趙泰東集成二男真卿叅奉真相敏成一男闡一都
事九成一男真純觀成一男真遇老成以族子真一
後玄成以真相後孫女及外孫男女及曾玄凡百餘
人多不悉記公之第四胤卽余之妹壻也余因得習
於公而知公之生平爲詳乃叙而銘之曰

胄則華矣材則良矣仕則蚤矣譽則長矣誰之不如
而止於斯位之不稱人以爲疑鳳凰于飛和鳴雝雝
戶庭芝蘭門闌二龍寬樂令終諸孫則百天之報善
如契不忒論公得失偶內畸外持此勸世可以無怠

有屹斯石樹諸遺墟鑱此銘章徵信所於

知議政府事靖平呂公墓碣銘

樗谷呂公諱稱字仲父捐館舍于今三百年流風緬邇其詳不可得以聞也然其踐履官職則有告身之傳錄者在我 太祖大王開國之年拜江原道觀察使 定宗大王二年拜兵曹典書 太宗大王四年拜東北面都巡問察理使兼都兵馬節制使七年拜開城畱後司畱後十三年拜左軍都摠制府都摠制輿地勝覽咸陽郡人物云呂某官至知議政府事其人品政事則有巡問時教書在略曰惟卿端方有守

剛直不回鍊達於理而令望寔多緣飾以文而華聞
夙播剖符宣化杖節觀風肆以承樞之秩遂叅議政
之司歷試煩劇屢彰績用不辱使命專對他邦是用
授以巡問之權指以節制之略若其生年則無可攷
其卒則 世宗大王五年有致祭文其褒嘉之辭略
同巡問時教書其末又曰頃以遲暮閒休于家者有
年譜牒曰以開城畱後退休本府後西江壓海亭而
卒祖密直副使諱公係考膳官署令追封叅知議政
府事諱吉孫妣慶州薛氏重大匡楊原君惇之女前
夫人南陽洪氏無育後夫人彥陽金氏都觀察使受

益之女男長稽佐郎次賁縣監女長適府使辛季參
次適朴景武稽之子曰縣監宗肅自是後益熾而昌
或以武進亦多文籍曾孫判書自新玄孫節度使允
哲仍父子著清白並載國乘八代孫右尹裕吉觀察
使祐吉都正裨吉九代孫叅判爾徵判書爾載十代
孫領議政聖齊掌令曾齊執義閔齊府使尹齊而十
一代孫承旨必容掌令必重方顯用於朝公之盛美
雖不聞其詳今以燾後之慶可想劬躬之德嗚呼休
哉葬在開城府大井里短表紀官號而已事績無述
公墓下一墓相傳金夫人墓而無徵不能據以爲必

然今必重誠深追遠大懼其愈久而愈昧將欲樹碣
載辭眎于後人一日謂余曰吾先祖之受命於東北
也子之先龜亭忠景公送行有詩有俗難卽化德可
移風之語可見其許與之分念舊德思先好託子以
文字之役噫二公之同寅共貞於 王朝者遠在三
百年前藐末後孫幸於今又修通家之義烏得無戚
戚于心也余於此不敢以不文辭遂叙而銘之曰
呂氏之先唐之萊人來東籍咸緣避巢氛譜牒所紀
始大將軍遙遙其緒世修以仁惟公挺生際會 聖
君出入中外贊襄經綸歷事 四朝備承寵恩年至

告去願養丘園寬樂令終垂裕後昆餘慶悠長與國
無垠載卿載公疊冕重軒沿流沂源實公忠勤篤于
追遠曰有賢孫刻文貞石以永其聞

益山郡守李公墓碣銘

公諱善淵字靜甫姓李氏籍德水今爲豐德府屬縣
始祖高麗中郎將敦守十代祖工曹叅議揚始入
本朝六世祖左議政荇以文章擅一時號容齋曾祖
僉知中樞府事贈左贊成諱安訒祖原州牧使贈左
承旨諱椿考振威縣令贈吏曹叅判諱觀夏妣全義
李氏右議政孝貞公行遠之女以崇禎乙亥歲生公

卅角已知名年十七登上庠才具識度多爲先輩所
稱許有遠大之期旣失怙恃固無意榮進及伯氏季
君相繼決科慨然曰世所以重科名爲悅親計而吾
已無及矣爲門戶計而吾有兄若弟在焉有何所覲
屑屑焉復踐場屋乎年四十始從門庇除 順陵叅
奉遷典牲奉事長興直長陞內贍主簿以避遞差訓
鍊都監郎廳癸亥除長水縣監十考皆最有去思碑
庚午拜司贍主簿移工曹佐郎其間除河陽縣監三
登縣令皆未赴遞除狼川縣監居一年哭長子悲哀
成疾自解歸再踐訓郎歷衛率工曹正郎甲戌除麻

田郡守赴數月以嫌遞乙亥除益山郡守居四年以
微文遞辛巳七月考終于京第九月窆于砥平縣東
壬午八月改葬于同縣居端里之原公仁心爲質勵
志篤行其事父母友兄弟敬愛兩盡執喪踰制水飲
終三年助祀竭誠雖冬月不廢洗濯至老猶然此固
出於天性之至到家訓之服習無容議爲若其居官
莅民也不事小察而詞訟自息不求近效而惠澤自
洽撫下如傷而抗直於上官律已甚苦而優施於窮
族此皆人所難及者也晚於世味益泊如雖官位棲
遲謂猶過本分無幾微之見於色雖生事獲落謂吾

道當然無營爲之萌於心與人交雖極溫恭謙遜亦不肯苟合意有不可則隨事規責辭氣嚴截不少假貸人亦感其誠欵不以爲忤畏而愛之平居簡於游從閉門却掃看書作字之外了無他事於書無所不讀於字規撫二王常曰人皆以岑寂無朋爲憂我則手一卷韻書亦足以消遣性好杯杓遇輒酩酊疎曠閒淡之趣於酒所益可見當其寢疾也親知有問死生之際動心否乎笑而不答戒家人以後事必使稱家而薄歛焉配同福吳氏進士贈左贊成挺奎之女文肅公晚翠億齡之曾孫和婉貞靜壺範克備無疾

言遽色終日端坐如泥塑人且敏悟識字多記前言
往行以自飭焉公姑稱之夫子敬之生以崇禎癸酉
歸以庚寅歿以乙卯葬祔公左男長道欽次德欽出
後於伯氏掌令公女適都事趙九鼎側室男從欽諸
孫男女若而人道欽早歿嗣孫尚弱德欽懇懇致孝
旣訖窀穸之事又以表墟無文德美不彰爲懼具狀
謁銘于余今已三踵余門矣噫余長於公六歲同成
辛卯進士當其時公年最少而才最高於今五十餘
載公之宦迹止此而且已千古者有年矣余乃老而
不死當公記實之託歲月之不可把翫人事之不可

定準如此甚可悲也遂叙之而系以銘曰

公之位卑矣自以爲足足於軒冕而遑遑公之家窶矣自以爲安安於金玉之營營公之年塵下壽矣自樂其天命樂於期頤而猶不能忘情於死生公於斯三者夫旣擠而與之矣則吾又何傷

教官金公墓碣銘

甲申

維我世宗大王二十六年上爲未出閤諸宗豫養擇師命集賢殿愼簡其人咸曰有生員金其姓大來其名者學問旣精又以孝登名于朝上又議于承政院皆曰可於是以前以教官召之公在忠清道結城

縣蓋山下奉母夫人專心於志物之養無慕乎其外
及膺命入朝上曰予知某孝親離違從宦能無愛
日之情乎其傳歸迎母公於是以駟還家奉雕軒登
途往來有煒一時榮之朝廷賢士大夫多贈以詩章
成公三問詩有云如公可使終野遺以禮擢爲宗英
師鳴騶一朝入雲扃兒隨母後駟馬馳朴公彭年以
公同年子又作詩卷序備言公窮經篤孝備承恩寵
之實此則得於二公詩若序可以徵信乃若其後事
傳聞不及無從而記焉公墓在本縣碧池山銀河峰
下魚寧里負甲之原公有二子曰鉉曰鎮鉉之七代

孫興九夏九尚守公丘墓時奉香火鎮官定平府使
子麟祥徙于江原道鐵原府官禮曹正郎贈判校子
軻官兵曹正郎贈承旨子地四早歿贈戶曹叅判有
二子曰應河應海應河光海戊午以宣川郡守從征
建州二元帥生降而獨戰死節義暴於天下事具載
忠烈錄褒贈領議政謚忠武立祠龍濟應海御營大
將忠武之子益鍊孫世龜並水使曾孫重禹以奉忠
武祀朝家推延世之賞今官判官重噐檢戎使應海
孫世翊漢城府左尹曾孫重元兵使重三水使重九
營將維我朝 世廟之治爲極盛藹藹吉士盈于朝

廷而宗英之師之選僉舉公而屬之至若馳駟輦母
養以祿于京中其殊榮異數實前世之所未有然則
公之人品之高學行之卓百載之下猶可想見而似
續之不大顯久矣積慶餘休及忠武始發不但一時
大其門戶而已將門出將擁節旄列棨戟累累而未
艾福祿之悠長伊誰之自也公新羅國姓至高麗上
洛公方慶移籍安東高祖寶文閣大提學諱承用曾
祖監察司掌令諱玖祖密直副使諱天順考通禮門
奉禮郎贈戶曹佐郎諱談銘曰
立身揚名不必在高位惟孝惟學垂裕後昆不但在

近代愈遠愈焯凡今之人如不信者請視斯銘於公徵也

掌令金君墓碣銘

君諱始徽字聖五新羅王子周元遜位居于溟州仍封郡王其後世居爲姓貫卽今江陵府也君曾祖諱虎變叅奉祖諱弘績奉事考諱世行持平妣江陵崔氏通德郎智徹之女君以孝宗大王元年庚寅歲生丁巳中生員戊午登文科由泮館轉陞六品內則禮曹佐郎兵曹佐郎正郎直講司藝掌令間有再拜三拜者焉外則黃海江原咸鏡三道都事慈仁縣監

高山察訪旌善郡守而魚川察訪平安都事除而不
赴莅旌善三朔甲申正月初五日卒官是年三月葬
原州酒泉碁谷里負子之原前配南陽洪氏通德郎
賀女後配江陵崔氏及第光浹女男壽龜女崔聖述
姜河妻前配出男壽龍壽麟女南鶴應妻後配出側
室一男壽鶴二配先葬江陵丘山驛南從先兆也余
於辛亥歲忝按北關時持平公任鏡城判官得相接
驩如也又於己巳歲罪謫江陵持平公下世已久君
解職家居待余以先友請文于持平公之碣余爲之
愴然而許之今君之胤壽龜斬然在衰經跋涉關嶺

謁君銘於余余之得周旋於持平公歷歷如前日事而兩世之墓已木拱而草宿人世之不可把翫如此遂復投涕而叙之君妙年占科歷職中外所處有聲及入栢府晉塗方闢適朝議有陰陽中其忌諱一斥不復終于郡綬年又不永悲夫銘曰
才之生難旣生矣用於世又難旣用矣遇於時尤難維時不遇維命之選維其有後維銘不朽

慶尚右兵使梁公墓碣銘

丙戌

公諱應涵字彥泳系南原鼻祖諱能讓高麗兵部郎中奕世冠冕入本朝有諱誠之吏曹判書南原君

謚文襄以文章勲德重一時文襄之孫諱允精郡守
贈通禮是生諱思訥監察贈承旨是生諱闇贈叅判
是爲公三代其贈以公貴也妣全州李氏學生思安
之女公以萬曆丁亥生辛亥登科癸丑除宣傳官兼
備邊郎辛酉陞司憲監察壬戌出機張縣監丁卯出
黃州判官都掾經歷辛未出長鬐縣監還值丙子虜
入扈駕南漢城丁丑在園中以推擇特差兼宣傳官
往來虜陣議事園解陞訓練都正戊寅出長興府使
移仁同不赴庚辰以匪意忤臺官被其構捏朝議咎
以相関並臺官論責謫襄陽旋釋壬午出慶源府使

乙酉又除訓練都正丙戌擢慶尚右道兵使戊子除
行首宣傳官出會寧府使庚辰授全羅右水使壬辰
又除訓練都正出吉州牧使不赴甲午出春川府使
及丙申年已至矣以禁軍將自免歸砥平鄉舍優游
田里以佚老焉戊戌考終于寢初寔縣西久之改葬
縣北東幕洞坐子之原夫人祔焉夫人漆原尹氏縣
令殷傑女舉三男二女長休奉直郎次試武科水使
以清白贈兵曹叅判次佑通仕郎女長適牧使安弼
星次適金宗相側室一男僕休二男益壽益齡試三
男益禧益祺益祉義禁都事佑一男益謙外出及曾

玄多不悉記公簡默沈重剛毅果斷歷職中外幾五十年宦業之可記者固多矣唯是清慎一節實有加於人數等靡麗紛華之物未嘗一近於身手至於戎裝鞍馬武將之所致意於緩急亦備用而已未嘗一有所修飾蓋任其素性非有所矯揉而然也以此所至軍民莫不畏威懷惠樹石頌德追思不已公嘗曰功名儻來有官則盡其職無官則退於鄉以此非外除辭朝未嘗一躡時宰之門又嘗曰遺子孫以安莫如有官則嗇於官無官則飢於家以此平居未嘗一畱意於生業且男試之宰郡也戒之曰我雖貧有常

祿可免飢寒勿以我故費官物貽老父羞試之清名著聞庭訓有素故也銘曰

砥峽之東山水明潔茅屋蕭然隱映林樾行人指點節度之廬韎韐之流若隱逸居出則擁旄歸則衡門固窮之節文士所難有子克孝家聲益闡人亦有言賢父之訓孫年不永亦有遺風維公所傳匪約伊豐念公裔人其可不覆百世在後觀此銘章

慶尚左水使梁公墓碣銘

今上之十二年丙寅四月慶尚左水使梁公試解官未歸卒于梁山時余叨相職啓于朝曰故水使梁試

任永興府使時臣觀察北路知其居官廉潔甚足可
尚生雖未及褒擢死宜有追獎之典知事申汝哲曰
梁試持身廉約罷官則衣食賴於假貸今聞歿於中
路自朝家顧恤其喪實合褒勸之道 上曰梁試廉
謹可尚增秩追贈優給喪需沿途護喪有司奉教如
令贈嘉善大夫兵曹叅判兼同知義禁府事歲丙子
余復叨相職啓于朝曰清白吏之選命下累年今始
磨勘而久曠之典朝議難於廣選以清儉著名如判
書南銑朴長遠監司李端錫姜裕後副提學趙持謙
水使梁試執義韓泰東掌令趙克善諸人皆不與物

情多惜之諸臣章奏或有續選之請重念事體不許
然朝家亦宜別有嘉獎以風勵百僚且朴長遠姜裕
後則子孫方在官若南銑梁弼等六人則雖有後不
得霑寸祿皆不免流離窮餓請令有司尋問其所在
周急且此與被選者有差錄用雖不及遠裔若子若
嗣孫如可任職亦令該曹訪問調用上曰甚善並
依啓以此公之第三男生員益祉拜 莊陵叅奉序
陞義禁都事益祉服習先訓不以官微而不自礪也
陵卒追思樹石頌德不幸遘疾不起於官次今益祉
之男權爲後於公嗣益禧者具公狀乞銘於余余於

此何忍辭諸按狀公字子儀籍南原先系世德具載
公考節度公墓文妣漆原尹氏縣令殷傑之女公以
天啓甲子歲生中辛卯武科拜宣傳官內歷則都掾
都事經歷備邊郎訓練副正禁軍將外出則古阜郭
山郡守平山豐川永興府使尚州海美營將終於水
閩之節公之廉節自是歷官日用之常事有難僂指
而悉數今以臨終附身者言之其赴北邑也外黨趙
判書珩知公無章服遺以紅皂二襲終身不改歿而
殮焉且以自身孚家者言之其自南邑棄官先歸也
封庫官出米包送衙中使備行資具夫人卻之曰恐

違夫子之意公稟性簡雅舉止雍容一如寒素儒生
居家孝友執親喪踰制當其析產自以有官祿推其
厚與兄弟自取其薄初娶陽川許氏學生壻女再娶
居昌慎氏學生訥女三娶綾城具氏正郎仁熙女公
初葬砥平縣西改葬縣北坐酉之原夫人慎氏祔焉
女武科宋遠規妻許出男益禧益祺慎出益祉具出
側室男益祿益禧之嗣卽權益祺男櫟益祉次男相
銘曰

古之官人以廉爲先廉則節用節用則愛民有美梁
公儉而處已約而處官生有令名歿有追恩公之廉

節上承下詒年雖有歿壽位雖有高卑若其風流三世一規凡在後人庶幾永保其家聲凡在鄉閭庶幾永肅其遺塋

陝川郡守李公墓碣銘

全義之李鼻祖太師諱棹有大勲勞於羅麗之際名德相承入本朝勲伐蟬聯近代有諱濟臣世稱清江先生文章節行高一時官北道兵馬節度使累贈領議政其季子諱命俊號潛窩以清操直節顯名仁祖朝選清白吏官兵曹叅判贈左贊成配義城金氏僉知中樞府事續祖之女以萬曆庚戌生公初名

元基字善長改諱善基公生有美質溫粹清明潛窩
公甚愛重之命就學于金慎獨齋先生之門勵志遜
業日有成就先生亟稱之遭內外憂以善喪聞晚以
門庇除景陽察訪遷宗簿直長陞主簿歷義禁都事
司憲監察出令歙谷遞還主司僕簿時尤齋宋相公
長銓曹與公有同門之舊習公賢超守沔川郡適以
註誤就理置對得伸守陝川郡道臣御史連褒優異
再賜表裏忤兵使配德山俄釋享年僅周甲卒于漢
師之寓舍初葬楊根先隴之左越二十五年癸酉以
形家言改窆洪州新村里負子之原公內行醇備律

已清苦非特素性然也孺染於家庭薰陶於師友亦豈少哉伯氏早卒丘嫂李氏主家政公事之甚謹事無大小悉稟而行之雖知舊饋遺官曹俸入亦未嘗私之於妻孥必並歸諸李氏俾從其意處之此尤非他人所可能餘可推知也常曰士大夫視錢財當如糞土以此歷職內外二十餘年未有纖毫爲子孫計者室完山李氏廣平大君章懿公璵之後典牲主簿侑之女事公執婦道無違禮公歿撫庶出如已子及二子之宰邑迭享專城之養常戒之曰臨民惟謹無使怨及老母也男長行政三嘉縣監次行敬聞慶縣

監出爲伯父顯基後次行教禦侮將軍出爲族父碩
根後次行徵通德郎女適郡守金壽賓行政一男萬
熙行敬二男萬赫萬珪行教二男萬始時任牙山縣
監萬培行徵以萬培後金壽賓一男盛益內外孫女
及曾玄多不悉記側室五男行敦行徹行致行敏行
敦昔余先子與公居止相近託以昆弟之義余在邕
角亦屢承公負劔之詔及公下世公之長胤三嘉君
念及先誼謁余以表墟之文余禮辭而敬諾之矣文
未及成三嘉君遽成千古今其胤萬熙又以先志來
徵噫余實不敏爲之重謝拭涕而銘之曰

維公世德不其厚而維清維潛裕厥後而公所生長
廼典訓而況就外傳相觀善而孝友爲政人無間而
治理有譽天褒荐而位卑不稱固時媿而壽不登
遐將孰尤而然公裏襮完且美而如玉無瑕豈容易
而子姓繩繩咸象賢而理之可必不信然而謁銘昭
遠知孝元而庶幾來者肅斯原而

戶曹正郎金公墓碣銘

余叔父判書府君交游重一時其最親厚而敬重者
曰金公諱弘振余亦因叔父得交於公時與之同筆
研而年與業皆後不敢與之抗也不期公久困於公

車終滯於郎署逸羣之才不展而宰物之具無試斯
豈非係時運盛衰而然者耶公之胤鼎臣思欲以公
之屈於生平者伸於身後具狀文謁余噫若使今日
如余叔父而尚在者余惡敢當斯役人世之不可把
翫重可悲也按狀公字聲伯新羅敬順王之後自麗
及本朝勲業文章世有其人高祖大司憲贈領議
政諱萬鈞曾祖左議政慶林府院君諱命元祖僉知
中樞府事贈領議政諱守廉考禮曹判書貞孝公諱
南重妣李氏宗室礪原正世憲之女以天啓丁卯歲
生公戊子中進士第二名甲午除水庫別檢以太蚤

辭丙申除 健元陵叅奉戊戌移翊衛司洗馬己亥
遭母夫人憂壬寅除典設司別檢陞義禁府都事癸
卯移戶曹佐郎遭貞孝公憂乙巳復入戶曹陞正郎
遞拜工曹出稷山縣監己酉病罷叙復入工曹移戶
曹辭遞庚戌拜司禦出新溪縣令辛亥隣邑守爲賊
所戕兵使以賊不得歸咎於公就理數日以誣枉釋
未幾暴疾卒葬于全義縣巢谷貞孝公兆次配韓山
李氏禮曹判書基祚之女生先公一年卒後公三十
年權厝于廣州先隴之次甲申四月移窆于溫陽範
圍村新卜之原別有誌狀有一男卽鼎臣方任清風

府使一女適李慶著鼎臣三男履行泰衍復衍李慶
著二女長適縣監朴弼純次適韓配文公有純性至
行濟之以文雅表裏均適左右俱宜其於爲人可謂
完且好矣其全雖不可悉其槩亦不可沒若言其事
親侍貞孝公之疾不解帶累月割指血和藥以進此
古人所謂孝子之有深愛者若言其友弟仲君遭孺
歿家人皆出避公獨畱親執歛襲此庾袞之見紀於
前史者若言其任職初拜戶曹郎曹中皆以年少儒
生易之及莅事綜理微密巨細無漏鄭相國致和時
判曹深歎服出宰輒請畱其在稷山正身率物束黠

吏杖官奴威信孚於下奸欺屏息豪猾讐服獄訟稱
平貢賦無負逮公之歸無一事見督過於上司其在
新溪邑在窮峽素多無名之賦前後相承恬爲故常
公下車一掃去之民始知官取於下有制適當大侵
賑飢朝暮臨視親嘗其糜粥設長窩給藥物濟活甚
多道臣上聞特命陞秩以褒之嗚呼公之內行外治
此其可稱者也若余平昔之所欣慕又在於目擊而
身際接其貌溫然其良玉聽其言薰然其芳蘭赴試
闈程藝士多奔波而視公之持已益覺其謹飭入賢
關秉論人或偏頗而觀公之處物一出於和平以此

道推之少却盛之玉堂大而措諸廊廟進塗通衢無
處不可所拘者只欠紅紙上題名耳此士友搢紳所
共嗟惋而又有進於是者昔我孝廟爲簡擇尚主
聚名家子入禁中特賜問鼎臣曰汝父近讀何書尚
未登第何其晚也無乃懶於讀書而然耶以此知公
聲名蚤徹於九重而竊惟聖意不但惜公之蹇屯
蓋遲待公致用於朝廷鄭重者如是我先王惜才
之盛德沒世不可忘而在公亦可謂不遇之遇也銘
曰

公之世奕然而卿相公之人超然而令上公之文蔚

然而明鬯誰之不如位不登而年不紓在此者過眼
五色之終迷在彼者噫氣萬竅之不齊若大有爲而
止於斯銘以昭之眎于無期

昌城君墓碣銘

維我宣祖大王有別子曰慶昌君諱珩配昌寧郡
夫人曹氏利川府使贈左議政明勛之女有男子子
四人其季諱似字子儀天啓丁卯歲生旣冠授昌城
正己亥差敬慕殿享官制畢陞都正丁未拜司饗
院副提調庚戌今上在春宮行冠禮任執酌加明
義封君兼副揔管壬子以赴燕超嘉德兼都揔管甲

寅 仁宣后違豫承命入診差 孝敬殿享官乙卯
再赴燕丙辰 明聖后違豫又命入診復常加綏德
戊午 上遘疾彌留入診議藥既瘳加興祿已未拜
宗簿寺提調仍差 璿源錄釐正廳堂上事完加顯
祿辛酉三赴燕拜司饗院提調戊辰特除惠民署提
調言路以格外爭旣停上章固辭且以病力乞並解
諸兼帶入文字凡九度輒優批不許遣醫賜劑恩禮
益隆己巳六月二十四日卒于寢 上震悼輟朝賜
秘器致賙賻予祭所以哀卹之者甚至九月從葬于
通津縣北嘉佐洞先塋之次公生有異質自弱齡莊

重如成人稍長篤志學業不事章句文辭專用力於
操存踐履以此服禮飭行雖布素之士有不及者記
性絕人潛心經史之餘旁及醫藥卜筮堪輿諸書過
眼不忘皆通大義且早歲丁內外憂毀幾滅性服闋
猶屬疾沈年因求攝養留意扁倉深得其要以此國
家議藥未嘗不在其間初配清州韓氏清原尉景祿
之玄孫庶尹緯之女端莊溫惠閨範孔宜生後公一
年歿先公三十一年初寔揚州及公歿遷祔焉後配
文化柳氏左議政寬之後司禦時亮之女慈和柔順
甚得婦道生于己卯歿于庚辰以形家言未克祔方

厝楊州西山清川君濂別提沈麟瑞妻韓夫人出濂
有志行丁公憂不勝喪褒贈旌閭文川君灌儒川君
馮柳夫人出濂二男密城君栻海城君攄爲灌後栻
二男廷煒廷燦沈麟瑞五男泐濟濯漫涓孫女及曾
玄若而人余之外黨有曹氏姑於公爲舅母故時節
候問或與公邂逅於曹氏之宅襲其風儀聆其辭令
雖不獲頻頻還往罄其交歡心之嚮逞則多矣今公
已厭世余獨支離於世回思疇昔若隔山河今密城
乃顧余於數百里外託公墓文儒川繼來申請按公
之狀其德容光輝寔余所親覲其忠勤至到亦國人

所共誦今茲稱述夫何愧色之有然念公天稟之美
自治之篤余旣舉其槩於前矣且地親處貴非有猷
爲於當世今欲表其遺懿誠無赫赫在事者然且有
一二可以因小而推大矣當明聖后之寢疾一日
幾不諱旁御妄先號踊掖庭如沸上冲年大震驚
公方以議藥會閤門外責相積曰玉候雖亟內外
當肅靜以俟之嚴近之地喧鬧若是輔相獨不能鎮
之耶積驚服趨進內庭叱止宮人請更使公入診公
曰玉候雖沈重脉度猶和保無他憂更議進藥
上心於是乎稍安宮中於是乎稍定終得良已之慶

當蒼黃急遽之際周旋得宜鎮定大內全保 兩殿

此實一時廷臣所不能及及辛酉使燕表文有誤字
禮部將加噴言於朝廷公呈辨曰身備使价不覺有
誤罰當在使臣不可延及本國使臣在此生死唯命
禮部亦服公得奉使之體寢其事此非忠欵誠懇有
足以感動者何能得此若令公當漢室之危而效更
生忠諫值魏朝之難而如子建求試則其爲輕重於
國家奚但止於斯而已也銘曰
凡在宗籍旣貴且戚不責以勞績然猶有自力以禮
被服爲善最樂念公之德稟自天得功由學殖志行

內篤威儀外飭斤斤而抑抑一味恭恪承天之澤
休問自足不聞政治職亦爲國磐石諸宗攸式肆垂
顯刻爰表幽宅不訛不泐

司導寺正崔公墓碣銘

丁亥

故司導寺正崔公之仲胤後公兄砥平公者判書奎
瑞以狀授余曰先親有墜言我死得南雲路銘金延
之書可以慰我茲敢請余旣諾而遲之未果判書君
又書速曰先親之墓猶無刻而金公遽逝矣所以望
公愈亟噫余耄矣亦將朝暮死復何待遂序而銘之
序曰若言公資性溫恭子諒之心蘊於內明悟敏給

之才達於外此公得於天賦者然也亦言公內行紉
能愛敬於父母長又遜悌於諸兄父母曰此子也才
諸兄曰此季也良以此終父母之身見奉養於公節
適寒暑扶將寢興皆惟公及至喪葬祭奠亦惟公經
營得以無憾有慎終錄藏於家亦言公師資幼從庠
師頭角已蘄然文義容止甚有可觀旣冠受業於慎
獨齋金先生之門晝則課農夜則讀書先生嘉其勤
篤亟稱道於人因得與儒林諸公游期許甚重嘗欲
棄舉業專心問學先生曰君親老家貧不可不念以
此黽勉者有年未四十止之亦言公宦業已亥以薦

除 昌陵叅奉序遷諸司奉事直長又以薦陞引儀
兼叅軍出漣川縣監與民同好惡恩義溥洽遭母夫
人憂邑民擔輶至墓山數百里不使他邑人替代鑄
鐵爲碑撫而流涕曰公去矣我何以爲生服闋除翊
贊出文化縣令奉公恤民一如在漣時賑政爲一道
最耻不言官備穀幾何賞止表裏甲寅不樂在官求
罷旋仍遷沔川郡守未幾又求罷歸利川莊舍庚申
拜江華經歷陞潭陽府使畱守啓畱之曰小大民人
如旱得雨意外移職若失父母父之拜淮陽府使又
當飢歲悉除一年邑入民賴以不流亡甲子遭長子

喪悲哀疾增棄官歸例當準期不叙而在朝諸公一口舉公破格拜成川府使除右水運判官陞司導寺正而皆以年衰疾痼固辭遞漣後三莅並有去思碑亦言公固窮中年僑寓城西上奉兩親菽水不繼早夜拮据勞悴備至時余居比隣竊矚之未嘗有非義之求無名之取此所謂窮視其所不爲者居官潔比在困亨猶易不必紀寓利川地主見其居陋送匠及材俾蔽風雨公曰居邑土者皆民爲民役民與受俱非固不受亦言公交際所嘗友善各取其長雖通介不類趣舍或殊皆與之有始終至於居卿相之位修

布素之好者亦有六七公而其處要地時雖屢過不
報謝或問朝政得失輒以不在位不謀政辭之自數
十年來士林有乖貳之漸公甚憂之丙辰訪尹大憲
拯勉之以處變之道癸亥見宋相國時烈懇懇以去
讒間爲規其後公聞多往來言囂囂每歎咤曰惟二
家俱不用吾言畢竟爲當世羞謂之何哉安岳民有
怨其守而發砲者兵使囚郡民之曾被罪於守十餘
人案已成時公令文化差推官一問盡出之兵使甚
慙且有甚間於守者而公不爲撓守亦無憾交好如
舊知其事者兩多之守卽金叅判壽增公所字稱延

之者也公諱碩英字巨卿籍海州遠祖高麗侍中沖
本朝副提學萬理錄清白吏曾祖諱慶昌有文武才
阨于時官止直講號孤竹祖諱渠佐郎考諱振海以
詩酒筆翰名有逸韻曠度官通政安山郡守妣宜寧
南氏副護軍贈兵曹判書諱柁之女公生天啓壬戌
卒今上之十五年己巳葬利川新谷村負癸之原
配光山金氏郡守自南女生後公二年卒後公十八
年葬祔公同塋異穴其奉尊章事夫子婦德咸備最
其末年以判書君名位隆顯有招損之虞與之歸鄉
不以他子孫分離爲念不以鄉居艱窶爲難子母相

樂安其養志而享其遐福其爲賢智雖求諸傳記何以加之男長叅奉翼瑞先公歿而有男尚健次卽判書君而有男尚震尚復尚鼎別檢尚謙尚觀尚履次直長星瑞而有男尚願女適士人鄭潭公是余先君之外弟而年較余不甚多從幼至長大相周旋同筆研故知之最深此公之終所以累余余旣叙公之槩抑又有感公之止科余問才足入彀何遽畫也曰以有老母故耳其後余乃有不勝愧於公言而自痛今見金夫人訓子其有所受於夫子也夫銘曰
用人必以科目乃如公美德亦不得大施於國良足

爲世道惜凡人之重科名咸云欲爲親榮公獨以母
老而甘於無成可見其自量與量時之明惠化止於
桐鄉門閭高於子公是公不多食於厥躬責後報者
豐

監察李公墓碣銘

戊子

公諱尚弼字夢卿我 太宗大王有別子曰孝寧大
君諱補孝寧之孫栗原君諱徐策敵愾勲栗原之孫
龍岡縣令贈吏曹判書諱藪宗籍親盡始仕于朝龍
岡之孫昌寧縣監贈戶曹叅判諱奎賓是公之祖昌
寧之子同知中樞府事諱滌是公之考也同樞之配

清州韓氏金化縣監琛之女公以萬曆癸卯歲生自幼天資秀出見者皆以遠器稱之甫十歲遭母夫人憂執禮如成人稍長文義蔚然十九委禽於趙玄洲續韓之門玄洲公見其儀度賞其詞翰稱之不已丁卯登上庠發解輒居前列而竟不得登名於一第惜哉丙子虜變同樞府君以竹山營將入衛南漢城公以家屬避兵旋走南漢欲得園中消息道聞大駕下城府君陪還入京省覲侍歡者數年己卯府君捐館公致敬致毀易戚兼盡宗黨稱其孝丙戌以薦拜穆陵叅奉遷司饗奉事司宰直長陞典牲壬寅甲午

出和順縣監到官首察民所好惡罷行之闔境稱其
便適同福革合本縣所以治之者如一冬坐微文罷
丁酉拜禁府都事戊戌移監察遞拜司評再拜禁都
出砥平縣監時楊根又革合本縣二邑民競稱之曰
是我侯非汝侯也未幾病遞甲辰拜宗簿主簿三拜
禁都於是公年已踰周甲矣歎曰暮年薄宦何足以
久羈此身遂引疾謝事日以詩酒自遣且愛趙松雪
書法頗臻其妙人有得者藏弄珍之丁未四月考終
於京第葬交河縣北月籠山西負坤之原配漢陽趙
氏卽玄洲公之長女天資莊肅婉孌事夫子無違禮

生後公一年歿後公十八年葬祔于公二男長察訪
任漢次通德郎儀漢四女權協權繁縣監尹燁朴斗
旺其壻也察訪二男嵩齡衡齡通德四男泰齡鼎齡
咸齡復齡女孫及曾玄多不悉記槩言公生平以愛
敬事長上以和樂處家衆內無得失之累於心外無
榮慕之競於人絕迹於朋游之徵逐耽味於書籍之
討論雖沈於下僚困於貧窶容色言語一未有涉於
憂歎近於刺促者人或勸之以營產則笑答曰有命
焉少嘗游於太學適當科設增廣疏請從祀多士翕
集成咸推公謹於持論敏於文筆自以爲不如也其莅

砥平捕得賊人數踰賞率公減聞其數以避陞資例
之俗吏之爲何啻千百里之遠哉余於公未嘗得一
日之雅而任漢之爲郵官踵余門請銘公墓今又命
衡齡來申前請是爲銘曰

太支之蕃最于宗籍承繼綿綿世多名德維公人地
宜若大啓詘于門庇才高位細位則雖細亦盡其職
壽且不遐早休實卓維其享少將以詒多銘以質之
永期無訛

同知中樞府事李公墓碣銘

余旣冠應公車入場屋人有指而示余者曰彼夫夫

爲李太素筆下有三峽水君可就問業也於是乎余
始識公面而豔公才矣後十數年余貳司空祇事
園陵公始仕爲寢郎於是乎余愧糠粃之前而歎公
陸沈之久矣後又三十餘年與公會于伽倻之麓水
源之洞鬢髮雖皤然而精神挺王意氣豪爽猶不減
始識面時余問公何以得此曰幼習文藝不無寸長
十三講席呈詩見賞十四發解亦或稱之然而三十
六始登上庠五十三自脫儒巾吾旣擠而與之又何
足存也吾於宦業雖無可紀歷踐諸司幸免敗闕金
吾水曹門庇之選晚宰彭澤家近百里及親在堂養

踰負米奉檄之喜可無餘憾及瓜借寇亦豈始望譽
既非真毀實无妄太空浮雲何有何無解紱而歸連
遭銜恤吾於斯世已絕意矣自分丘壑畢吾餘年且
吾有仲名曰先白曾事弓馬出乘邊障自言衰邁倦
歸在家且吾有季名曰東白謂渠伯仲蚤事文武游
學在外不顧生產自捨儒業盡力稼穡內而奉親外
給二兄衣食百須皆由渠出今雖不洎亦式相好兄
弟三人同居一室和樂且湛綽綽有裕且有二子曰
澤曰沆澤於湖營再建戎節往來定省如在膝下且
推恩典加吾之秩又於蘇秦重佩郡符莽蒼之間日

供甘旨沈雖非才且後吾季能成進士慰渠兩父官
隨壽高寵贈及先又多孫兒足娛目前性耽吟詠至
老不廢亦嘗臨池頗知八法自作自書不覺其疲西
巖水石近在家西杖屨來往不煩舁乘築室自號聊
以寄趣意者天之錫吾以難老抑或以吾之無以憂
用老故耶余曰然公可謂稟之厚而用之嗇者歟足
乎已而無待於外者歟蚤畸於人而晚偶於天者歟
自種其德而身食其報者歟孟氏之一樂孔氏之爲
政箕疇之五福可謂皆備於公公之命余者可爲公
身後之傳表鄉里而樹風聲欽于世世者也公諱震

白太素其字恭靖大王八代孫曾祖諱克儉贈司
僕寺正祖諱昌胄贈左承旨考諱定邦贈戶曹叅判
妣平壤趙氏府使撫女配青松沈氏從仕郎謨女婦
道克修宗黨咸則公生于天啓壬戌年八十六考終
于海美縣餘美村世居之第寔其近先兆負子之原
夫人後公一年生先公三十七年卒寔在公塋之左
育二男又有三女適士人金克寶金錫景尹商慶澤
三男倚天倚春一幼沈二男倚杖倚相諸孫女及曾
玄多不悉記公於詩天得也筆則學從祖梨川相國
甚肖公之遺文有述懷二篇一儷一韻讀此可得公

槩前歲公寄余詩求和且請西巖記余未之果今於此不勝迸淚幽吟之慟乃作銘曰

西巖老人題詩請記華星在天落花滿地許之在心奄隔幽明茲述墓文追答平生

兵曹佐郎李公墓碣銘

海西觀察使李君彥經爲其先府君叅判公請墓銘于余許而未果觀察君又以書來速曰石旣治敢告余謝不敏遂叙之公諱廷麟字瑞徵初諱元麟九代祖寧海君諱塘我莊憲大王別子也傳子及孫代稱宗英屬籍旣盡有贈左通禮諱德良生司評贈承

旨諱耆命生進士贈承旨諱揚烈生佐郎贈叅判諱
時苾是爲公四世叅判公夙負才望而不第官不顯
配慶州鄭氏郡守皓之女以天啓乙丑生公丙子江
都之陷先叅判府君任分司而家屬在闕中時公年
未成童而能出入傳語於虜騎雲擾之中了無畏懾
見者奇之及長勤問學善草隸有能詩聲庚寅丁先
公憂癸卯承重祖妣喪辛亥遭先夫人艱荐罹巨創
前後處堊室者九歲及至向衰之年猶致毀盡誠恤
然有孺子之慕宗黨稱之及服闋絕意於朋遊却掃
一室日以觴詠自娛庚申中庭試丙科第二名祿不

逮養當榮加戚以年高隸成均館辛酉例陞六品拜
典籍其日移禮曹佐郎兼春秋館記事官俄遷兵曹
出沃溝縣監公曰人之以專城爲喜者上以奉親下
亦以妻孥計吾則俱已矣惟一心奉職報答 君恩
斯可矣且曰爲官者非公則私非廉則貪出乎此必
入乎彼甚可畏也苟公而廉斯過半矣公積傷於喪
威宿抱沈痼之疾不能食食不得不時近杯杓不悅
者以河東之毀聞於道臣中考功法罷還壬戌四月
卒于京第六月窆于廣州細村先兆之側前配朔寧
崔氏縣令克良女後配光山金氏郡守自南女其葬

並異岡相望有三男一女皆金夫人出長彥經登文科光顯于朝公之封贈以其推恩也次彥緯進士縣監次彥紘早夭女適士人沈廷鳳彥經有一男八女男春躋士人沈啓賢縣監張震煥士人宋必勲韓師德鄭錫厚權致重黃最其女壻也一未行彥緯有四男弘躋光躋明躋亨躋一女適士人姜壽奎昔余纔勝冠入泮宮始識公託交觀察君又以居止相近嘗問字於余有繼世之好與之相習者久矣公內行淳篤而外不求知於人故家乏菽水年且踰艾不得不擇祿之仕文詞足以入彀而時命不偶故遲暮之後

始登名於一第發軔之初又躡於下邑公旣無樂乎
進取天且不假之以年茲所謂宜達而窒歸成後人
者乎銘曰

於戲李公維行之謹維學之勉維喪之存維第之晚
維命之蹇維年之靳維身之吝維嗣之羨

藥泉集第二十



